

গিত হানা -৩

অহিরা



সমটাউঅইআ

কিরিটি মাহাত
রঞ্জিত কুমার মাহাত

অহিৰা

সমটাইঅইআ

কিৰিটি মাহাত

ৰনজিত কুমাৰ মাহাত

মূলকি কুড়মালি ভাখি বাইসি

AHIRA

(A selection of Traditional Ahira Geet)

By

Kiriti Mahato

Ranjit Kumar Mahato

(State Aided College Teacher, The Dep. of Bengali, Santaldih College)

পহিল নিখরন: ডিসেম্বর, ২০১৫

দসর নিখরন: নভেম্বর, ২০২১

মলাট: সাধন মাহাত

আখড়বিছন: বুদ্ধেসসর মাহাত

নিখরনে: মুলকি কুড়মালি ভাখি বাইসিক তরফলে
ফুলচাঁদ মাহাত, পুরুইলা।

উখড়নে: সারনা পিরিনটারস, নরথ লেক রউড, পুরুইলা।

বেহরি: ১০০ টাকা।

জাগর জরইআ
অজিত পরসাদ মাহাত

পরছনি

কুড়মি জাইত আর এহে মুলুকেক কিরসি সইভতাক সঁগ সঁজড়ল জতেক হড়মিতান জাইত, গঠ আর সমাজ আহাত সভেকর আপন পরব হেকেইক সহরই-বাঁদনা। এসন কিনা মানভুমেক সিঁআইড় ডেঁহগি গটে ঝাড়খনড মুলুকেক লকেকরউ বেড়ে রিঝ আর ছবেক পরব হেকেইক এহে বাঁদনা।

এহে পরবকে লেইখুন আর ছউ দিন ধরি পরবেক নেগাচারিকে লেইখুন জন গিত মানুস গাহত উ গিতগিলিনেই হেকেইক সহরই গিত বা বাঁদনা গিত। সলমটে কহাইক অহিরা গিত। আইঝাউ এহে গিত গাহি কিসান আর ধাঁগইড়ানিখা ছউ দিন ধরি পরব মানত আর নেগ সিরিউঅত। ই বাঁদনা পরব আর একর গিত কতেক পুরখেইন আর কতেক দিনলে চলেহেইক একর অড়পুঁথানেক টউআ আইজ তড়িক হেউএইক নিহি। তবে কুড়মালি পুরখেইনি পুরান কাথা লে বুঝাইক ই পরবটা আর গিতগিলিন ভারতেক সিনধু-হড়পপাক আদি কিরসি সইভতাক লে চালু আহেইক। ইটাক নমুদ আর সাবুদ আহেইক অহিরা গিতেই। জেসন মালচনঅ বা মেলুহা দেস, হড়দিপি নগর, কুড়ুম পাহাড়, পাঁচ লদি, সিনধু লদিক নাম আর ফরছাইন অহেটাই নিখরাউএইক। অহে খাতির কহা জাইক গিতগিলিন ই জাইত আর গঠগিলিনেক পুরখেইন ইতিহাস হেকেইক।

মেনতেক হেলে কিনা হেকেইক? হাজার হাজার বছর ধরি বাপ, দুধুবাপ আর বুঢ়াবাপেক সিরজল গিতগিলিন আইজ তড়িক মুহে মুহেই রহি গেলাহেইক। আর মুহে মুহে রহেক খাতির কতেক পুরখেনি গিত জে হারাই হেজাই গেলাহেইক তাকর চিনহামুদা পাউআ আইজ মসকিল। তা হেলেউ এখনউ জনগিলিন জিআই আহেইক উ গিলিনকে বাঁচান হামরাক দাই হেকি। এহে অহিরা গিতেক পঁথিটা অকরেই আড়াপাটা অকরেই কসনি।

পঁথিটা ফাঁড়ইআ, ভাখিচারি পছড়ইআ, গাহইআ নিখাক টুকুঅউ কামে লাগলে হামরাক এহে খাটালি পসাতি।

নেহরে-

কিরিটি মাহাত

রনজিত কুমার মাহাত

ধাঁগইড়া

- ১। ফালগুনি মাহাত, মালথইড়।
 - ২। বিনদাবন মাহাত, পিঠাজড়।
 - ৩। সকতিপদঅ রাজুআড়, সরইলা।
 - ৪। রামলাল মাহাত, পাঁড়কা।
 - ৫। নকুল মাহাত, মালথইড়।
- (পুরুইলা)

অহিরা গিত

(১)

অহিरे— খজা খজইতে আউল, পঁছা পঁছইতে রে বাবু হউ
কতি ধুরে অহিরাকা ঘার ?
অহিরাকা ঘারে ভালা তুলসি চঁউঅরা হউ
উপরে ত ঘুরেই হাঁসারাই।
অহিरे— জাগে মাঞ লছমিনি জাগে মাঞ সিরমনি
জাগে ত আমাবইসা রাইত
জাগে কা পতিফল পাউঅবে গে মালিনি
পাঁচঅ পুতা দসঅ ধেনু গাই
আণ্ড জাগাউল অহিরা, গাঁউএকে গরাম গউ
তবে জাগাউব সিরিগাই।

(২)

অহিरे— কাকর সিরিজল দিআরা রে বাবু হউ
কাকর সিরিজল বাতি
কাকর সিরিজল রাই সরিসা তেল
জরে লাগল আমাবইসাক রাইত ?
অহিरे— কুমারেকর সিরিজল দিআরা রে বাবু হউ
ভউজিকর সিরিজল বাতি
বরদাকর সিরিজল রাই-সরিসা তেল
জরে লাগল আমাবইসাক রাইত।

(৩)

অহিরে— কাঁহা হিঁ আহউ তর গুরু মাঞ বাপ রে বাবু হউ

কাঁহা ত আহউ সিরিগাই?

কাঁহা হিঁ আহেই ভালা ধানি ডিমনি রে

কাকর সিরিজল হার?

অহিরে— ভিতর ঘারে আহউ ভালা গুরু মাঞ বাপ রে বাবু হউ

গহাইলে ত আহউ সিরিগাই

খেতে খরইএ আহেই ধানি ডিমনি রে

গুসাঞ রাই সিরিজল হার।

(৪)

অহিরে— কনঅ মইসি মর সুপ দেখি ভিড়কই রে বাবু হউ

কনঅ মইসি ডহরে চরই?

কনঅ মইসি মর পুরুব মুহে ডাঁঢ়াইএ

কনঅ মইসি লেইএ দুব ধান?

অহিরে— পেঁড়রি মইসি মর সুপ দেখি ভিড়কইএ

কারি মইসি ডহরে চরই

সির মইসি মর পুরুব মুহে ডাঁঢ়াইএ

সেহ মইসি লেইএ দুব ধান।

(৫)

অহিরে— ইসসর মাহাদেবে তকে না সিরিঙ্গল
গসাঞ রাই ত নাভাই মততভুন
পারবতিঞ রে গেইআ ঘারে গারে বটিল
মততভুমে দেলউ ছপলাই।

(৬)

অহিরে— কনহ খাড়িকেরা ইআরা হউ দিআরা বাবু হউ
কনহ কাড়িকের তের-
কনঅ গেইআকের বতিআ ধরাই দিহা
জরত কুইলি আধা রাইত?
অহিরে— চনদন খাড়িকের ইআরা দিআরারে বাবু হউ
কাপাস খাড়িকের বাতি
ধলি না গেইআকের বতিআ ধরাই দিহা
জরত কুইলি আধা রাইত।
অহিরে— ভাচাক ভুচুক দিআ জরই রে বাবু হউ
মানুসেকর ছাঁহির না মিলাই
উঠেরে অহিরা জাগে রে অহিরা
গেইঅ ধনিকে দেবে দুবি ধান।
অহিরে— রিমিঝিমি রিমিঝিমি পানিআ বরসি গেল
আঁগনাঞ ত পড়ল কাই
রসে রসে বাহারাবে সিরমনি গেইআ গে
খড়কত সিঁথেক সিঁদুর।

অহিরা।।৯

(৭)

অহিরে— কনঅ জে গেইআ ভালা ধারিঞ চলি জাইত রে বাবু হউ

কনঅ গেইআঞ লেলউ দুবি ধান

কনঅ গেইআ ভালা সুপ দেখি ভিড়কইএ .

কনঅ গেইআ ফরকি ডাঁটাই?

অহিরে— রেংগড়ি জে গেইআ ভালা ধারিঞ চলি জাইত রে বাবু হউ

ধলি গেইআঞ লেলি দুবি ধান

লালি জে গেইআ ভালা সুপ দেখি ভিড়কইএ

কুইলি গেইআ ফরকি ডাঁটাই।

(৮)

অহিরে— কাকর পুতা ভালা নাবালক রে বাবু হউ

কাকর পুতা বলিবান

কাকর পুতা ভালা বার হাঁথ ঝাঁপাউঅইএ

রগড়ি ধরইএ ধেনুগাই?

অহিরে— গেইআ ধনিক পুতা ভালা নাবালক রে বাবু হউ

মইসিকর পুতা বলিমান

বাঘাকর পুতা ভালা ফাড়ে ভার হাঁথ গউ

রগড়ি ধরইএ ধেনু গাই।

অহিরা ॥১০

(৯)

অহিরে— উপর কুলহিঞ খেলে হেল নাচে হেল বাবু হউ
তহর বরদাঞ আনল ঘুরাই
চালে রে চালে ধেঁগুআইন মর কিসানা ঘার
মদে পিঠাঞ করত মাতাল।
অহিরে— দুআরিঁ দেখে বরদা কাঁচি না জিঅরি রে বাবু হউ
গহালিঞ ত দেখেহিস জাগর
কাটল ঘাঁসে বরদা উঠেহিস বসেহিস হউ
সনা মুহে কাটেহিস পাগুড়।

(১০)

অহিরে— কিআ জে হেতউ অহিরা আঁচির পাঁচির রে বাবু হউ
কিআ হেতউ ধন বিসই
কিআ জে হেতউ অহিরা সনাক অঁগ দেহি হউ
কিআ হেতউ ভভেকর বাজার?
অহিরে— ধসি গরি জাউঅত আঁচির পাঁচির রে বাবু হউ
ধন বিসই উড়ি পাড়ি জাই
গলি জে পচি জাতউ সনাক অঁগ দেহি হউ
রহি জাতউ ভভেকর বাজার

(১১)

অহিরে— পুরুবা-পছিমা সইঞে নাভল কুটুমা রে বাবু হউ
বইসা কুটুম গড় অরমাই
খেতে জে আহি মর জঅ গহম হউ
গেইআ ধনি আহি জে গাভিন
অহিরে— কবেহিঁ রে অহিরা পাকতউ জঅ, গহম রে বাবু হউ
কবে ত গেইআ ধেনুআই?
কবেহিঁ রে অহিরা সতুআ কুটাউঅবে
কবে ত করবে বিদাই?
অহিরে— মধু মাসে অহিরা পাকে জঅ, ডেমরে বাবু হউ
আসাড় মাসে গেউআ ধেনুআই
কাত্তিক মাসে অহিরা সতুআ কুটাউঅব
বাঁদনাই ত করব বিদাই।

(১২)

অহিরে— কাঁহাহি রে বরদা চরলে বাঝলে রে বাবু হউ
কাঁহাহি করল সিনান
কাঁহাহি রে বরদা বির মাটি মাথলে
এখন ত নাচ লাগাই?
অহিরে— বিজু বনে রে বরদা চরলে বাঝলে রে বাবু হউ
মালা দহে করলে সিনান
বেরিআ উঠইতে ভালা বির মাটি মাখইএ
এখন ত মাটি লাগাই।

(১৩)

অহিরে— কাঁহাহি রে বরদা তহরি জনম রে বাবু হউ
কাঁহা ত লেলে গিরহ বাস
কনেহি রে বরদা পালল পসল
কনে ত দেলউ ভউরা নাম?

অহিরে— পছিমে রে বরদা তহরি জনম রে বাবু হউ
সিখর ভুঞে লেলে গিরহ বাস
গলাহি রে বরদা পালল পসল
বাগাঞ ত দেলউ ভউরা নাম।

অহিরে— কিআ বরন বরদা তর আঠ অংগ রে বাবু হউ
কিআ বরন দুইঅ চইখ
কিআ বরন বরদা তর দুইঅ কান রে
কিআ বরন দুইঅ সিংগ?

অহিরে— ধলা বরন বরদা তরঅ আঠ অংগ রে বাবু হউ
কুঁদলা কুঁদল দুইঅ সিংগ
সুপতি বরন বরদা তর দুইঅ বান রে
সুরুজ বরন দুইঅ চইখ।

অহিরে— কনঅ না গেইআ আউঅই ধুরুক ধুসুরা রে বাবু হউ
কনঅ গেইআ আউঅই রে সুরগ
কনঅ না গেইআ আউঅই অতি বড় রূপে গউ
কনঅ গেইআঞ ভরত ভাঁড়ার?

অহিরা।।১৩

অহিরে— বারে জে বারে মাগল বারুন করই রে বাবু হউ
 এহে ছেউরে না চানাইয়া গাই
 ধন খউআবে মাগল মডুআ টুগাউবে রে
 কবত করবে অরান।

অহিরে— বারে জে বারে মালিন বারুন করই রে বাবু হউ
 এহে ছেউরে লেগব গাই
 ধন খউআউব মালিন মডুআ টুগাউব গে
 জতেক লাগতি কেলেস।

অহিরে— বারে জে বারে মালিন লাইগ ত বাঢ়াউব রে বাবু হউ
 মর হাথে গজড়া পিতর
 ঝুটিহি ধরব মুঠিহি মারব
 মারব গজড়া পিতর।

অহিরে— বারে জে বারে মালিন লাইগ ত বাঢ়াউব রে বাবু হউ
 মর গঠে আহে লিল সাঁড়
 টেগেহি টারত সিঘেহি মারত
 লেইএ জাতউ তিরিছু দেস।

অহিরে— তিরিছু তিরিছু গংখলেবাগাইলা রে বাবু হউ
 তিরিছু কেইসন দেস
 কনে জে আহউ বাগাল সেহ না দেসে হউ
 কনে উহা বাঁধল দেস?

অহিরে— তিরিছু তিরিছু ঘংখলে মালিনিআ রে বাবু হউ
 তিরিছু মালনচ দেস
 মাটিকর ঘরনা ঝাটিকর ঘড়না
 বুঢ়া বাপে বাঁধল দেস
 তহেঁ মহেঁ বাঁধল দেস॥

(১৪)

অহিরে— কীরা পাউকল হ্যামে কাঠি না বসি রে বাবু হুট
কীরা পাউকল খেত বসি
কীরা পাউকল হ্যামে চিহ্ন লগা হুট
কেইসে ঘর কড়ব ভিয়ার ?

অহিরে— পাহাডেই আছট মেখে কাঠি না বসি রে বাবু হুট
তুঁতবিঞ ত বহই খেত বসি
খেত বনে আছট মেখে চিহ্ন লগা গট
জড়া ঘরা কবব ভিয়ার ।

(১৫)

অহিরে— কনে জে খালউ ডালা উপরে উপরে রে বাবু হুট
কনে জে খালউ নিদাড কল
কনে জে খালউ ডালা মাঝ অগিনাঞ বসি হুট
কনে জে খালউ মইয়া ঘর ?

অহিরে— চিলহে জে খালউ ডালা উপরে উপরে রে বাবু হুট
সিআরে তঅ খালউ নিদাড কল ।
মিণ্ডআনিঞ খালউ ডালা মাঝ অগিনাঞ বসি হুট
ছুটা পুতাঞ খালউ মইয়া ঘর ॥

(১৬)

অহিরে— কনঅ দিগে উমড়লঅ কনঅ দিগে বরসল বাবু হুট
কনঅ দিগে লেগলঅ ধটআহি
কনঅ বিরিন তরে কনঅ ধনি ভিজইএ হুট
আর ভিজই সিখেকা সিদুর ?

অহিরে— পুরুন দিএ উমড়লঅ পছিম দিএ বরসলঅ বাবু হুট
নামহালে ত লেগল ধটআহি
তৌতইরঅ বিরিন তরে চন্দবাবানি ভিজইএ হুট
আরঅ ভিজই সিখেকা সিদুর ॥

অহিরা ॥১৫

(১৮)

অহিরে— বেচিহঁ বেচিহঁ সঞআ সুরধনি মইসিনি বাবু হউ
লেইএ লিহঁ জড়া ধেনু গাই
বেরা উগাঞ বাহারাউবে বেরা ডুবাঞ সাঞধাবে হউ
বড়ি সুখে বিততঅ জে রাইত।।
অহিরে— তকেহঁ বেচব, মইসিনি নিহি বেচবঅ বাবু হউ
লেইএ লেবউ জড়া ধেনু গাই
বেরা উগাঞ বাহারবউ বেরা ডুবাঞ সাঞধাউঅব
বড়ি সুখে কাটব জে কাল।।
অহিরে— মকে বেচি রে অহিরা করিস না রে ভুলা রে বাবু হউ
কনে তকে করতউ সুসার?
কনে তকে দেতউ অহিরা রাঁধি বাঁটি মুহাই হউ
কনে তকে পাড়তউ টকাইর?

(১৯)

অহিরে— কনঅ জে গেইআ ভালা ধারিঞ চলি জাইঅ ত বাবু হউ
কনঅ গেইআঞ লেলা দুব ধান
কনঅ জে গেইআ ভালা সুপ দেখি ভিড়কই হউ
কনঅ জে গেইআ ফরকি ডাঁটাই?
অহিরে— রেঁগড়ি জে গেইআ ভালা ধারিঞ চলি জাইঅত বাবু হউ
ধলি গেইআঞ লেলা দুব ধান
লালি জে গেইআ ভালা সুপ দেখি ভিড়কইএ হউ
কুইলি গেইআ ফরকি ডাঁটাই।।
অহিরে— দুআরাহঁ দেখেঁ বরদা কাঁচি না জিঅরি রে বাবু হউ
গহালিঞ ত দেখেহিস জাগর
কাটলঅ ঘাঁসে বরদা উঠেহিস বসেহিস হউ
সনা মুহেঁ কাটেহিস পাণ্ড।

অহিরা।।১৬

(২০)

অহিরে— কনঅ সুরঁগিঞ ভালা গুঁড়ি কুটই রে বাবু হউ

কনঅ সুরঁগি গুঁড়ি ঝাড়ই

কনঅ সুরঁগি পুরই গজমতি সর গউ

কনঅ সুরঁগিঞ দেই দুবা ধান ॥

অহিরে— কামিনি (বহু) সুরঁগিঞ ভালা গুঁড়ি কুটই রে বাবু হউ

বহিনি সুরঁগি গুঁড়ি ঝাড়ই

ভউজি সুরঁগিঞ পুরই গজমতি সরঅ হউ

মাঞে ত দেঅই দুবা ধান ॥

(২১)

অহিরে— কাকরঅ বাঢ়লঅ ডগা না ডগি রে বাবু হউ

কাকরঅ বাঢ়ি গেলা ধান

কাকরঅ বাঢ়লঅ সিঁগালাখা জঅ হউ

কাকর বাঢ়ল সিঁগালাখা বইনা ?

অহিরে— ভাইগমানেক বাঢ়লঅ ডগা না ডগি রে বাবু হউ

অভাইগাকর বাঢ়ি গেলা ধান

হাআএকর বাঢ়ল সিঁগালাখা জঅ হউ

নন্দাক বাঢ়ল সিঁগালাখা বইনা ॥

অহিরা ॥ ১৭

(২২)

অহিরে— কনঅ পাহাড়েকেরি কঁচি কঁচি বাঁস রে বাবু হউ

কনঅ নগরেকা ডমিনি

সরু সরু বেতিআঞ সুপঅ বুনত হউ

সেহ সুপে গেইআনি চুমাঞ?

অহিরে— কুড়ম পাহাড়েকেরি কঁচি কঁচি বাঁসঅ রে বাবু হউ

হড়দিপি নগরেক ডমিনি

সরু সরু বেতিআঞ সুপঅ বুনত হউ

সেহ সুপে গেইআনি চুমাই।।

(২৩)

অহিরে— কেথিকে চিকনঅ ভালা বনেকে তিতিরঅ রে বাবু হউ

কেথিক চিকনঅ ধেনু গাই

কেথিক চিকনঅ ভালা খাউআসিনেক বেটি হউ

কুলহি মাঝে লহসরেন্ জাই?

অহিরে— ধুরাকে চিকনঅ ভালা বনেকে তিতিরঅ রে বাবু হউ

ঘাঁসেকে চিকনঅ ধেনু গাই

তেলেকে চিকনঅ ভালা খাউআসিনেক বেটি হউ

কুলহিক মাঝে লহসরেন্ জাই।।

অহিরা।।১৮

(২৪)

অহিরে— কনঅ জে গেইআ ভালা উলুঁগি সুলুঁগি রে বাবু হউ
কনঅ গেইআ বরনে ডাঁঢ়াই
কনঅ জে গেইআঞ কহেই ডাঁঢ়াঞ ন গে বহিনি
খাইলিঅ কই মুঠা ঘাঁস?
অহিরে— রাঁগি জে গেইআ ভালা উলুঁগি সুলুঁগি রে বাবু হউ
ধলি গেইআ বরনে ডাঁঢ়াই
কুইলি গেইআঞ কহেই ডাঁঢ়াই ন গে বহিনি
খাইলিঅ কই মুঠা ঘাঁস।।

(২৫)

অহিরে— কাকরঅ বেটা ভালা পদুআ পনডিতঅ রে বাবু হউ
কাকর বেটা বসেই দরবার
কাকরঅ বেটা ভালা হেকে বলিমান হউ
রগদি ঘুরাউঅই ধেনুগাই?
অহিরে— রাজা কে বেটা ভালা পদুআ পনডিত রে বাবু হউ
দেউআনেক বেটা বসেই দরবার
কিসানাকে বেটা ভালা হেকে বলিমানঅ হউ
রগদি ঘুরাউঅই ধেনু গাই।।

অহিরা।।১৯

(২৬)

অহিরে— কনঅ জে ফুলা ভালা অরিধন পরিধনঅ বাবু হউ
কনঅ ফুলা নিতেই রে আহাৰ
কনঅ জে ফুলাএ ভালা রাই-রইআক পুজা হউ
কনঅ ফুলাএ রাখলঅ সঁগসার ?
অহিরে— কাপাসঅ ফুলা ভালা অরিধনঅ পরিধনঅ বাবু হউ
ধান ফুলা নিতেই রে আহাৰ
বেইলঅ জে ফুলাএ ভালা রাই রইআক পুজা হউ
সিঁদুর ফুলাএ রাখলঅ সঁগসার ॥

(২৭)

অহিরে— কনঅ জে চাসা ভালা ঠেঁগা হারে ঘুরই রে বাবু হউ
কনঅ চাসা গাঢ়াই ভাঁসি জাই
কনঅ জে চাসা ভালা মইধ খাঁধাএ ঘুরই হউ
কনঅ চাসা পিটিকে বাঢ়াই ?
অহিরে— কুড়মি জে চাসা ভালা ঠেঁগা হারে ঘুরই রে বাবু হউ
জলহা চাসা গাঢ়াই ভাঁসি জাই
তেলি জে চাসা ভালা মইধ খাঁধাএ ঘুরই হউ
কামার চাসা পিটিকে বাঢ়াই ॥

অহিরা ॥২০

(২৮)

অহিরে— কনঅ ধনিঞ সেঁউতএ চইতঅ বইসাখঅ রে বাবু হউ

কনঅ ধনিঞ সেঁউতই আসাড় মাস

কনঅ ধনিঞ সেঁউতএ সরাবন ভাদর হউ

কনঅ ধনিঞ সেঁউতই কাততিক মাস?

অহিরে— ছাগইর ভেঁড়িঞ সেঁউতএ চইত বইসাখ রে বাবু হউ

মইসি ধনিঞ সেঁউতই আসাড় মাস

বেটি ছউআঞ সেঁউতই সরাবন ভাদর হউ

গেইআ ধনিঞ সেঁউতই কাততিক মাস॥

অহিরে— কিআ লাইএ সেঁউতএ চইত বইসাখ মাস রে বাবু হউ

কিনা লাইএ সেঁউতই আসাড় মাস

কিনা লাইএ সেঁউতএ সরাবন ভাদর হউ

কিনা লাইএ সেঁউতই কাততিক মাস?

অহিরে— রউদ লাগি সেঁউতএ চইত বইসাখ রে বাবু হউ

কাদা লাগি সেঁউতই আসাড় মাস

করম লাগি সেঁউতএ সরাবন ভাদর গউ

পরব লাইএ সেঁউতই কাততিক মাস॥

অহিরা॥২১

(২৯)

অহিরে— কনে মরলে অহিরা কাঁচঅ কুঁঅর রে বাবু হউ

কনে মরলে রে টুঅর

কনে মরলে অহিরা বাঁহিক বল টুটই হউ

কনে মরলে সুনা ঘার?

অহিরে— বাপঅ মরলে অহিরা কাঁচঅ কুঁঅর রে বাবু হউ

মাঞ মরলে রে টুঅর

ভাই মরলে অহিরা বাঁহিক বল টুটই হউ

ভউজি মরলে সুনা ঘার।

(৩০)

অহিরে— উপর কুলহিঞ খেলে হেলঁ নাচে হেলঁ রে বাবু হউ

তরঅ বরদাঞ আনল ডাকাই

চালে রে চালে রে ধিঁগুআইন মর কিসানা ঘার হউ

মদে পিঠাঞ করব মাতাল।।

বিসই: গঠ পুজাক মাহাততি

গিত

অহিরে— আবু জে হেকেইক ভালা গঠঅ পুজাক দিন গউ
গেইআ ধনি ঘুরতউ বাথান
গেইআ জে ধনি ত ঘুরতউ বাথান গউ
আবু হেকেইক গঠঅ পুজাক দিন।

অহিরে— নেহি অহিরাঞ সুনইএ নেহি অহিরাঞ মানই গউ
লেইএ জাহ জড়নিকর বন
লেইএ জে গেল ভালা জড়নিকর বন গউ
সভে গেইআ ডহরে উজাই।

অহিরে— একা কসা গেলি গেইআ দিঅ কসা গেলি গউ
তিনি কসে জড়নিকর বন।
সভে জে গেইআ ভালা বনে ঢুকি গেলা গউ
গেইআ ধনি ঘাঁসে ঝুঁঝুকাই।

অহিরে— সভে জে গেইআ ভালা বনেহি চরইএ গউ
অহিরা ত খেলই চইলি ডাংগ
আর না অহিরা ত খেলই চইলি ডাংগ গউ
বাঘাঞ ভালা করল নজর।

অহিরে— আর জে বাঘাঞ ভালা করল নজর গউ
সিরমনি দেখউবে করই
সির জে মনি গেইআঞ দেখে ত পাউঅল গউ
আবু অহিরাকে বাঘেছ জে খাই।

অহিরে— আর জে অহিরা ত খেইলে মাতআর গউ
বাঘা ভালা দবকি আউঅই
জহা জখলে বাঘা দবকি আউঅইএ গউ
অহিরা ত খেইলে মাতআর।

অহিরে— চিলেকর লিসন বাঘা আউএবে করইএ গউ
বেঁগা লিসন লেইএ চলি জাই
আর জে সিরমনি দেখউবে করইএ গউ
অহিরাকে বাঘউআঞ জে খাই।

অহিরে— আর জে সিরমনি কহউবে করইএ গউ
সভে গেইআকে কহউবে করই
সুনা কি সুনা বহিন বিনতি হামরা গউ
সুনি লিহা সব দুইঅ কান।

অহিরে— আর জে অহিরাকে বাঘউআঞ জে খাই গউ
চালে বহিন ঘারা ঘুরি জাব।
সভে জে গেইআ ভালা ডহরে উজাল গউ
চলি আউঅই হরদিপি নগর।

অহিরে— চলি জে আউঅই ভালা হরদিপি নগর গউ
গেইআ ধনি ডহরিঞ উজাই
বাখান টাইড়ে গেইআ ডাঁঢ়াউবে করইএ গউ
গলিনি কানুআ লেগই।

অহিরে— আর না গলিনি কানুআ লেগইএ গউ
গেইআ ধনি কাঁদউবে করই
গেইআ জে ধনি ভালা কাঁদউবে করই গউ
ঢর ঢর নইনাই বহই লর।

অহিরে— আর না গলিনি কহউবে করই গউ
সুনে গেইআ সব দুইঅ কান
কিআ তর দুখ গেইআ কিআ তর বিপতি গউ
কিআ দুখে নইনাই বহই লর।

অহিরে— কিআ জে দুখে তরি নইনাই বহই লর গউ
কাঁহা গেলউ অহিরা গউআর
অচন বচন গলিন কহউবে করইঅ গউ

গেইআ ধনি কহউবে করই।
 অহিৰে— কিআ কহব গলিন কহলে না জাই গউ
 সেহ দুখ কহলে না জাই।
 আবু জে হেকউ ভালা গঠঅ পুজাক দিন গউ
 গেইআ ধনি ঘুরতউ বাথান।
 অহিৰে— নেহি অহিরাঞ সুনইএ নেহি অহিরাঞ মানই গউ
 লেইএ গেলউ জড়নিকর বন
 জড়নিকর বনে গেইআ ঘাঁসে ঝুঁঝুকার গউ
 অহিরা ত খেলই চইলি ডাঁগ।
 অহিৰে— আর জে অহিরা ত খেইলে মাতউআর গউ
 বাঘা ভালা দবকি আউঅই
 জহা জখলে বাঘা দবকি আউঅইএ গউ
 চিলেক লিসন লেইএ চলি জাই।
 অহিৰে— অচন বচন গেইআ দেলউ ত সুনইএ গউ
 গলিনি কাঁদবে করই।
 আর জে গলিনি কাঁদবে করইএ গউ
 এহ বিধি লেখই ভগবান।
 অহিৰে— সোল জে বছর হামর উমইর জে হেউঅই গউ
 ইসন সমইএ হেলঁ রাঁড়
 হামর গেলি ভালা দুইঅ হাঁথেক সাঁখা গউ
 গেলি হামর সিঁথেক সিঁদুর।
 অহিৰে— হামর গেলি ভালা সিঁথেক সিঁদুর গউ
 ইসন সমইএ হেলঁ রাঁড়।
 অচন বচন গলিন কহবে করইএ গউ
 মুড় পটকাই কাঁদবে করই।
 অহিৰে— সূনে কি সূনে গেইআ বিনতি হামর গউ
 সুনিলিহ সব দুইঅ কান

জেহ না ঠিনে ভালা অহিরাকে খালউ গউ
 সেহ ঠিন দেবে গ দেখাই।
 অহিরে— সেহ না ঠাঞ গেইআ দেবে না দেখাইএ গউ
 অকর সঙ্গে হামহুঁ মিলাব
 অচন বচন গলিন কহবে করইএ গউ
 গেইআ ধনি ডহরে উজাই।
 অহিরে— সডে জে গেইআ ভালা ঘার ঘুরইএ গউ
 গলিনি বনে রহি জাই
 আর জে গলিনি কাঁদবে করত গউ
 গাছেকেরি উই মাটি ঝড়ই।
 অহিরে— গাছেকর উই মাটি ঝড়উবে করত গউ
 গলিনি কাঁদই উঁচসর
 বনেকর মাঝেঁ দেখেই আহে সিমইর গাছ গউ
 সেহ গাছে সুগুনি বইসই।
 অহিরে— সেহ না গাছে দেখই সুগুনি বসইএ গউ
 চলি গেলি সুগুনিকর পাস
 চলি জে গেলি ভালা সুগুনিকর পাস গউ
 সুগুনিকে কহউবে করই।
 অহিরে— তঁহি জে হেকিস ভালা সুগুনিকর জাইত গউ
 মড়া মসান করইস নুড়ন
 জেহ না ঠিনে ভালা অহিরাকে খালউ গউ
 সেহ ঠাউএ দেবে ত দেখাই।
 অহিরে— সুগুনি জে তখন ভালা কহউবে করল গউ
 সূনে ভালা বিনতি হামর
 তঁহি জে হেকিস ভালা নর মানুস গউ
 হামি হেকিএ পঁখিকেরি জাইত।
 অহিরে— হামর সঙ্গে ভালা কেসে তঁহি জাবে গউ

কেইসে দেবউ দেখাই সেহ ঠিন
অচন বচন সুগনি কহউবে করইএ গউ
গলিনি কহবে করই।

অহিরে— তরি জে গড় সুগিন নেপুরাঞ বাধব গউ
তরি ঠঠে হিংলি ঢারব
উপরেঁ উপরেঁ সুগিন উড়বে করবে গউ
তরি ছাহাঞ হামে চলি জাব।

অহিরে— অচন বচন গলিন কহবে করলউ গউ
সুগনি ত উড়বে করই
উপরে উপরে সুগিন উড়উবে করল গউ
তাকর ছাহাঞ গলিনি জাই।

অহিরে— জেহ জে ঠিনে ভালা অহিরাকে খালউ গউ
সেহ ঠাঞ দেলি ত দেখাই
আর না গলিনি কাঁদই উচ সরে গউ
এহ বিধি লেখই ভগবান।

অহিরে— আর না গলিনি হাড় গড় বিছি গউ
জেঠিন জেটা দেলউ ত বসাই।
হাঁথ জে গড় ভালা বসাউবে করলি গউ
অগনিকুনড করউবে করই।

অহিরে— আর না অগনিকুনড দেল ত ধরাইএ গউ
ছাই বানি করউবে করই
ছাই জে বানি গলিন করবে করইএ গউ
ছাই বানি গুটাউবে করই।

অহিরে— মানুষ ছাঁপ ভালা আঁখউবে করল গউ
মুড় ধরি কাঁদউবে করই
আর জে এহ বিধি লেখই ভগবানে গউ
এহ বিধি লেখই ভগবান।

অহিরে— হামর গেলি ভালা দুইঅ হাঁথেক সাঁখা গউ
গেলি হামর সিঁথেকর সিঁদুর
আর জে গলিনি কাঁদই উচসরে গউ
ভগবানে সুনৈ ত পাউঅই।

অহিরে— আর জে ভগবানে সুনৈ ত পাউঅইএ গউ
অকর ভালা বিপদ হেউঅই
সাত জে দিন ভালা সাত জে রাতি গউ
সাত দিন রাইত কাঁদউবে করই।

অহিরে— আর জে কিনা বিপদ হেউঅবে করইএ গউ
ভগবান ত ভাভউবে করই।
আর জে ভগবান ত সাজবে করইএ গউ
গনক ঠাকুর ভেস ধরি জাই।

অহিরে— গনক ঠাকুরেক ভেস ধরবে করইএ গউ
তাল পাতেক পাঁজি রে বনাই।
তাল জে পাতেক পাঁজি লেলউ জে বেনাইএ গঅ
চলি গেলউ গলিনিক পাস।

অহিরে— আর জে চলি গেল গলিনিক পাস গঅ
গলিনিকে কহউবে করই
বানি জে কুঁড়ে তঁহি কাহে জে কাঁদিস গঅ
কন তর হেউঅবে করই।

অহিরে— আর জে কনঅ তর হেউঅবে করই গঅ
এহ কথা কহউবে করই
অচন বচন ঠাকুরেঁ কহবে করই গঅ
গলিনি কহউবে করই।

অহিরে— কিআ কহব ঠাকুর কহলে না জাই গঅ
এহ কথা কহলে না জাই
এহ না সমইএ ভালা সএগ মরল গঅ

এসন সমইএ হেল রাঁড়।

অহিরে— হামর সঞআক সংগে হামই মিল্লাউব গঅ
এহে ঠাকুর বিনতি মাগই।

অহিরে— অচন বচন গলিন কহউবে করল গঅ
ভগবানে কহবে করই।
সুনে না সুনে বাছা বিনতি হামর গঅ
সুনি লিহ সব দুইঅ কান।

অহিরে— পছিমেকর মেঘ আউঅবে করই গঅ
ছাই বানি লেগত ধোআই
অচন বচন ঠাকুরেঁ কহবে করইএ গঅ
নেহি গলিন সুনউবে করই।

অহিরে— আর জে নেহি গলিন সুনউবে করইএ গঅ
গলিনি কাঁদই উচ সর
আর জে নেহি গলিন সুনউবে করই গঅ
ভগবানে কহউবে করই।

অহিরে— আর জে নেহি গলিন সুনউবে করইএ গঅ
গলিনি কাঁদই উচসর
আর জে নেহি গলিন সুনউবে করই গঅ
ভগবানে কহউবে করই।

অহিরে— নেহি জে তঁহি জদি বানি কুঁড় ছাড়উবে গঅ
সুনে বাছা সব দুইঅ কান
আর জে বেমুখ হেইএ বইসউবে করবে গঅ
এহ কথা কহউবে করই।

অহিরে— বানি কুঁড় ধরি গলিন বেমুখ হেইএ বইসই গঅ
ভগবানে মারল চাবুক
আর জে ভগবানে মারল চাবুক গঅ
হরি হরি কহি উঠি জাই।

অহিরে— হরি জে হরি কহি উঠি জে বইসল গঅ
গলিনিকে কহউবে করই
আর জে সুনে তিরিআ বিনতি হামর গঅ
সুনি লিহ সব দুইঅ কান ।

অহিরে— হামরঅ কাল ঘুম লাগি জে গেলি গঅ
কাঁহা গেলউ সিংগালাখা পাল ?
অচন বচনঅ অহিরাঞ কহউবে করল গঅ
গলিনি তবে কহউবে করই ।

অহিরে— সুনে কি সুনে সঞআ বিনতি হামর গঅ
সুনি লিহ সব দুইঅ কান
সভে জে গেইআ ভালা বাথানে ডাঁঢ়াল গঅ
চালে সঞআ ঘার ঘুরি জাব ।

অহিরে— হামর গিত ভালা গেলি গঁগা পার গঅ
দেবে ভাইরে উড়নি বাজাই ।

গাই আর গঁগাক লিআই

- অহিৰে— কইলাস উপৰে গেইআ ধনি চৰবে কৰইএ হউ
চৰত সাত দিন রাইত ।
সাত দিন রাইত ধনি পৰবত উপৰে হউ
মচা ডুৰাইএ ঘাঁসঅ খাই ।।
- অহিৰে— সিরমনি গেইআ ধনি কইলাস উপৰে রে বাবু হউ
চৰত সাত দিন রাইত
মচা ডুৰাইএ ধনি ঘাঁস খাউলঅ গউ
লাগি গেল মধুৰে পিআস ।।
- অহিৰে— পানি পিআসে ধনি পৰবত উপৰে হউ
লাগাউহঅ পানিকে বানার
পৰবতে উপৰে দেখা সিরমনি গাই রে বাবু হউ
পৰবতে ঘূৰবে কৰই ।।
- অহিৰে— পৰবত উপৰে ধনি ঘূৰবে কৰইএ হউ
নাহি মিলে পানিকে বানার
পানি পিআসে গাই ধনিক দমটুটি জাই গউ
পানি বিনু মরত ঝুৰাই ।।
- অহিৰে— সিরমনি গাই ধনি পানি পিআসে রে বাবু হউ
বিরিখ তৰেঁ রহলঁ ডাঁড়াই
পানি পিআসে ধনি দমটুটি জাই রে বাবু হউ
চর চর করত বদন ।।
- অহিৰে— সিরমনি গাই ধনি পৰবতে কাঁদই রে বাবু হউ
মাহাদেবেক আসন টলই
হর-পারবতি দেখা আসন উপৰে রে বাবু হউ
এসন খনে আসন টলই ।।
- অহিৰে— এতনা দেখিকে পারবতি মাহাদেবেঁ কহই রে বাবু হউ
সুনা নাথঅ বচন হামর

কনঅ খাতিরে ঠাকুর আসনঅ টলই রে বাবু হউ
কনঅ জিউ দুখঅ পড়ি গেল।

অহিৰে— এতনা বচনঅ পারবতি মাহাদেবকে কহেই রে বাবু হউ
মাহাদেব ত ধেআনে বসই
ইস্‌সরঅ মাহাদেবঅ ধেআনে বসই রে বাবু হউ
পাউঅলঅ সিরমনি গাই।।

অহিৰে— পানি পিআসেঁ ধনি করহ রদনঅ বাবু হউ
সুন দেবি বচন হামর।।

অহিৰে— সাতঅ রাইতঅ সাতঅ দিনঅ পরবতঅ উপরেঁ রে বাবু হউ
গেইআ ধনি করই রদন
পরবত উপরে ধনি পানি পিআসেঁ রে বাবু হউ
নেহি পাউঅই পানিকে বানার।।

অহিৰে— এতনা বচনঅ মাহাদেব পারবতিকে কহত রে বাবু হউ
সুনা ধনি বচনঅ হামর
সিরমনি গাই ধনি পিআসেঁ রহই রে বাবু হউ
করেঁ ধনি তাকরঅ উপাই।।

অহিৰে— একঅ বকলি পাইখঅ করহ সিরজন রে বাবু হউ
উড়াই দেহঅ পুরুবা তরফ

অহিৰে— দুই হাঁথ মইলঅ মলি সিরজন করল রে বাবু হউ
তাহে পনখি বনাউবে করল
মাহামাঞ পারবতি পনখি বনাউঅই গউ
বকলি পনখি দেলউ জিউ দান।।

অহিৰে— বকলিআ পনখি পারবতি জিউ দান দেলউ রে বাবু হউ
আকাসেঁ দেলউ রে উড়াই
পুরুব বাটে পনখি দেলউ উড়াএ গউ
গাই ধনিক নজরে ভেটল।

অহিৰে— সিরমনি গাই ধনি নজরে দেখলঅ রে বাবু হউ

বকলি পানিকে বানার
সুইন পনথে পনখি উড়ি করত গমন রে
এহিঁ দেতি পানিকে বানার ।।

অহিরে— বকলিআ পনখি দেখঅ পানিকেরা পাইখঅ গউ
জাঁহা পানি তাঁহা রে বইসই
উপরেঁ উপরেঁ পনখি উড়ি উড়ি জাই রে
গেইআ ধনি হেঁঠে চলি জাই ।।

অহিরে— পরবত ছাড়ি গেইআ মরতএ চলেই রে বাবু হউ
সিরমনি গেইআ ধনি জাই
উপরেঁ উপরেঁ পনখি উড়ি উড়ি গেল রে
চলি গেলাই গঁগা কে কিনার ।।

অহিরে— গঁগা কিনারে দেখাই বকলি বইসে রে বাবু হউ
গেইআ ধনি গেল রে চলল
গঁগাকে পানিঞ ধনি ঠানি ঠানি নামই গউ
গঁগা মাঞে করত বারুন ।।

অহিরে— সুন কি সুন গেইআ বচন হামরঅ রে বাবু হউ
তঁহি ধনি মহা অপরাধ
হামর পানি গেইআ ধনি না জে পিঅ গউ
তঁহি ধনি মহা অপরাধ ।।

অহিরে— গুহে গবরেঁ ধনি চরবে করিস রে বাবু হউ
মরতভুঞে করিস মইলান
বাগাল মুনিসে তরি সিঁগে ডাঁগ মারই গউ
বাঁটঅ মলি দুধঅ রে দুহই ।।

অহিরে— সেহ খাতিরে ধনি তঁহি অপরাধ রে বাবু হউ
হামর পানি না করিস পান
এতনা বচন গঁগা করলঅ জবান গউ
গাই ধনি ঠমকি ডাঁঢ়াই ।।

অহিরে— এতনা বচনেঁ দেখঅ সিরমনি গেইআ রে বাবু হউ
গংগা মাঞ করল টকাইর
হামে জে হেলঁ গংগা কেইসে অপরাধ গউ
তঁহি গংগা কেইসে পুইনবান ।।

অহিরে— তহরি বুকে গংগা মড়া মসান বহই রে বাবু হউ
নর পাপি করিস খালাস
কেঁউটাকা বেটা তরি বুকে চঘি ঘুরই গউ
ফেঁকতঅ দেখা মাহাজাল ।।

অহিরে— হামর ত পুতা গংগা মনরথঅ সাঁড় রে বাবু হউ
মনরথঅ সিবেক বাহন
হামর ঘিঅ দেখা পুজা পাশাঞ লাগই গউ
হামর ঘিউ মহকে বেচাই ।

অহিরে— হামরঅ পুতা ধনি আগু হারে চলেই রে বাবু হউ
হামর দুখে মাহাদেব সিনান
হামর লাদে গংগা বসমতা সুদধঅ গউ
হামে গংগা কেইসে অপরাধ ।।

অহিরে— চালা কি চালা গংগা মাহাদেবেক পাসঅ রে বাবু হউ
মাহাদেবেঁ করতবিচার
এতেক না বচনে ধনি মরতভুঞ ছাড়ে গউ
কইলাসেঁহি উঠঅবে করই ।।

অহিরে— সিরমনি গাই ধনি মাহাদেবেঁ লালিস রে বাবু হউ
পেঁছুঞ পেঁছুঞ গংগা ধনি জাই
আগে চলেই গেইআ ধনি পেছুই গংগা চলেই গউ
চলি জাইত মাহাদেব লালিস ।।

অহিরে— কইলাসঅ উপরেঁ জানই হর মাহাদেবঅ রে বাবু হউ
তাঁহা গেইআ ধনি চলি জাই
গেইআ ধনিক পেছুঞ ভালা গংগা ধনি গেলি গউ

জাঁহা বসি হর মাহাদেব ।।

অহিরে— এসন সমইএ ভালা ঘটেই অঘটনঅ রে বাবু হউ
মহাদেব তঅ নেঁসাঞ অচেতন
ভাঁগঅ ধতুরা পিএ মাহাদেব অচেতনেঁ গউ
গাঁজাক নেসাঞ ঘুমে অচেতন ।।

অহিরে— এতেক না খনে ভালা গেইআ ধনি ঠানই রে বাবু হউ
মনে মনে সঁচবে করই
গাঁজাকর নেসাঞ মাহাদেব গড়াগড়ি জাহই গউ
কেইসে হামে করবঅ লালিস ।।

অহিরে— সিরমনি গেইআ ধনি ঠানই রে বাবু হউ
খনঅ দুধঅ দেলউ বরিসাই
একঅ ধারঅ দুধঅ ধনি দেলউ বরিসাই গউ
মাহাদেবকে করাউলঅ সিনান ।।

অহিরে— একঅ ধারঅ দুধঅ ভালা মুহঅ উপর ফেলে রে বাবু হউ
মাহাদেবেঁ করত পিআন
দুধঅ সিনান পিআনে চেঠা হেইএ গেল গউ
মাহাদেবেক নেসা ফাটি জাই ।।

অহিরে— দুধঅ সিনানে হরেক নেসা ফাটি গেলঅ রে বাবু হউ
নজরে সুবাত সিরি গাই
এসন খনে ধনি করত লালিস গউ
সুনে মাহাদেব বচন হামর ।।

অহিরে— কনঅ খাতিরে ঠাকুর হামি মাহাপাপি রে বাবু হউ
গঁগা ধনি কেইসে পুইনবান
গঁগা কা বুকো ভালা মড়া মসান বহই গউ
নর পাপি করত উতধার ।

অহিরে— হামর পুতা মাহাদেব আগু হারে চলই রে বাবু হউ
হামর পুতা তহরি বাহন

হামর ঘিউ দেখা পুজা পাশাঞ লাগই গউ
হামর দুখে মাহাদেব সিনান ।।

অহিরে— কনঅ খাতিরেঁ মাহাদেব হামে মাহাপাপি রে বাবু হউ
গঁগা ধনি কেইসে পুইনবান
এতেক না লালিসঅ ধনি মাহাদেবকেঁ করই গউ
মাহাদেবেঁ করলঅ বিচার ।।

অহিরে— তঁহি জে লাগিস ধনি মাহাপুইনবান রে বাবু হউ
গঁগা ধনি মাহা অপরাধ
এতেক না বচন মাহাদেব কহবে করলঅ গউ
গঁগা ধনি পুবে চলি জাই ।।

অহিরে— গেইআক গুমান মাহাদেব দেলউ বাঢ়াই রে বাবু হউ
গঁগা ধনি হেলঅ রে নইরাস
গেইআ ধনি জিতলঅ গঁগা ধনি হারই গউ
গঁগা মাঞ পুরুবে চলি জাই ।।

অহিরে— পানি পিআসেঁ ধনি রহলঅ ডাঁঢ়াই রে বাবু হউ
কইলাসেহিঁ রহলঅ ডাঁঢ়াই
এসন খনে মাহাদেব উপাই করল গউ
একঅ জঁটা দেলউ রে টুটাই ।।

অহিরে— জঁটাকে ভিতরে রহে গঁগা সুরধনি রে বাবু হউ
সেহঅ পানিঞ করাউতঅ সিনান
জঁটাক পানি ভালা গেইআ ধনি পিঅই গউ
গেইআ ধনিক মিটলঅ পিআস ।।

অহিরে— এতেক না ভালি হরে গেইআ ধনিকে কহতঅ রে বাবু হউ
জাউ ধনি মরতঅ ভুবন
মরতঅ ভুবনে ধনি গেলা ত চলি গউ
মরতভুঞে করহ পালন ।।

অহিরে— সিরমনি গেইআ ধনি ঘুরবে করল রে বাবু হউ

ঘুরি আউলঅ আপন গলাফার
গেইআক গুমান মাহাদেব দেলঅ বাঢ়াই গউ
গাই মাঞেক বাঢ়লঅ মান ॥
অহিরে— জেসন জানঅ বিরহ গাউঅল
মুহে লিহা হর হরিক নাম
অধম ফালগুনি গাউঅই মরন সমইএ
দিহা হর জুগল চরন ॥

নানছ আর ননদেক कहनि

अहिरे— हरदि नगरे बसई नानछ आर नन्द रे बाबु हउ
नानछ नन्द सहदर भाई
नानछ किसान लागई घारेके मालिक गउ
नन्द लागई मईसि किसान ।

अहिरे— नानछ किसान जाने राजा माहाजन हउ
नानछई जानई कुटुम सजन
नन्द किसान हेउअई मईसि बागाल गउ
साठि मईसि करत मईलान ।
साठि सुरहि मईसि आनत लेगत गउ
नन्दई करेई मईसिक जतन ।

अहिरे— चाँह्र पहर राति बिति गेलाई रे बाबु हउ
हेईए गेलाई फरिछ बिहान
फरिछ बिहाने नन्द पालँक से उठल गउ
साजल मईसि बागाल ।

अहिरे— मुड़े बाँधल नन्द पाग पगड़ि रे बाबु हउ
अटि लेलउ ननिहर चादर
गड़े पिँधल नन्द सनाके थड़म रे बाबु हउ
हाँथे लेला सना मुठि डाँग
साठि सुरहि मईसि देलउ खसाए गउ
डहराई देलउ बन बाट ।

अहिरे— डहरे डहरे मईसि जात चलल रे बाबु हउ
पिँपड़ तरे मईसि बाथान
बड़ पिँपड़ तरे मईसि बाथान रे
मईसिगन गेलह बाथान ।

अहिरे— एसन खने नन्द मने मने ठानलअ रे बाबु हउ
मईसिके देलउ रे उठाई

বন ডহর মইসি দেল ডহরাএ গউ
পেছু লাগি নন্দ চলি জাই।

অহিরে— আড়ে দিঘে বার কউস আছাঁদা বন রে বাবু হউ
বন হেউঅই ঝিলুহি জানাই
হিলা হিলা বন নন্দ গেল চলল রে
আড়ে দিঘে হেউঅই বার কউস।

অহিরে— আছাঁদা বনে মইসি গেলা সামাই রে বাবু হউ
মইধে বসল নন্দলাল
চারি ভিতে মইসিগন বন মাঝে চরইএ গউ
মইধে বইসল নন্দলাল।

অহিরে— উঁচই না দেখে নন্দ গাছ কাটল রে বাবু হউ
মাঝে দেখি ফাড়াবে করল
দিঅ ফাড়া করি নন্দ খড়মা ছলল গউ
নন্দলালে নেহি রে মালুম।

অহিরে— এসন সমইএ বাঘা আউঅল চলি রে বাবু হউ
জাম ঝুড়ে রহল লুকাই
নন্দ কিসানকে করল নিসানা রে
নন্দাকে ধরবে করল।

অহিরে— নন্দ কিসানকে বাঘে জখল রে বাবু হউ
নন্দলালেক নেহি রে মালুম
সাঠি সুরহি মইসিক নজর গিরি গেল গউ
মইসি ত জুকতি জড়ল।

অহিরে— সূনে সূনে মইসি ধনি বচন হামর রে বাবু হউ
নন্দলালকে বাঘে লেইএ জাই
নন্দ কিসান জদি বাঘে লেইএ জাত গউ
পুরি জাতউ বনেকা ঘাঁস।

অহিরে— পুরি জে জাতউ ধনি বনেকর ঘাঁস হউ

পুরি জাতউ জবুনা সিনান
এসন ভালি মইসি জুকতি জড়ল গউ
একিন হেএ জুকতি জড়ল ।

অহিরে— সাঠি সুরহি চারি ভিতে রহেই রে বাবু হউ
বাঘা সগেঁ লাগল লঢ়াই
সাঠি সুরহি মইসি বাঘঅ সঁগে লঢ়এ গউ
বাঘঅ ত ভাগি চলি জাই ।

অহিরে— এসন খনে নন্দ উঠি ডাঁঢ়াই রে বাবু হউ
মইসি ধনি নন্দ চঘি জাই
মইসিকর পিঠে নন্দ চঘি ত জাই রে
মইসি ত ধরেই ঘারেক বাট ।

অহিরে— মহলেক ভিতরে ভালা অঘটন ঘটে রে বাবু হউ
নানহুক বহুএও কহবে করই
আঝু রাতিএও হামে সপুনে দেখল গউ
নন্দলালকে বাঘে লেইএ জাই ।

অহিরে— নন্দ কিসানকে দেখা বাঘে লেইএ জাই রে বাবু হউ
দেউরানি ত কামিনি হামর
হামর হেল দেখা অন বড় ধন রে বাবু হউ
হামর হে রাজা মাহাজন ।
হামর হেল ভালা বসতি মহল গউ
হামর হেল কুটুম সজন ।

অহিরে— ডুভাকর মাড়ে ধনি কামিনি খাটত রে বাবু হউ
পুরান লুগা দেবেই পিঁধেলাই ।
এতনা বচন ভালা নানহ বহু কহইএ
নন্দ বহুই সুনৈ রে পাউঅই ।

অহিরে—এতনা বচন ধনি কানে অনাল রে বাবু হউ
নন্দ বহু কাঁদে ঢরঢর

কাঁদি ন কাঁদি ধনি বুইধ ছাঁদল রে বাবু হউ
মনে মনে বুইধ ছাঁদই।
হাই হাই দইআ হামর বিধি ভগবান গউ
কাঁচি উমইরে হেলঁ রাঁড়।

অহিৰে— কাঁদি ন কাঁদি ধনি বুইধ ছাঁদল রে বাবু হউ
মহল সে বাহাৰে জাই
বসতি মহল ধনি ছাড়বে করল গউ
ধরি লেলউ বন ডহর।

অহিৰে— কাঁখে দাবল ধনি গবর ঝুড়ি হউ
সাজি গেল নন্দকে বানার
নগরে বাহিৰে ধনি জাহ চললা গউ
পুৰব ভিতে নজর চালাই।

অহিৰে— এসন খনে দেখ নন্দা ঘুরই রে বাবু হউ
মইসি ধনি ঘুরে ঘার বাট।
নন্দ কিসান ভালা মইসি পিঠে আউএ গউ
নন্দ বহুই নজরে ভালই।

অহিৰে— এতনা ভালিকে ধনি ঠমকি ডাঁটাইরে বাবু হউ
নন্দলাল নাভে রে খজি
সুরহি মইসি ধনি আউঅল চলল রে বাবু হউ
নন্দ বহু কাঁদে ঢরঢর।
উলটি পালটি ধনি করহ রদন গউ
কাঁদল ভুঁঞে রে লটাই।

অহিৰে— এতনা ভালিকে নন্দ কহবে করল রে বাবু হউ
সুনে ধনি বচন হামর
কনঅ খাতিরে ধনি করহ রদন গউ
কনঅ দুখ গিরল তহর।

অহিৰে— কিআ জে হেলউ খাই মাখেক দুখা রে বাবু হউ

কিআ তরে মরে ছট ভাই
এতনা বারতা নন্দ কহবে করল গউ
নন্দ বহুঞ করহ জবান ।

অহিরে— নেহি জে হেউঅই হামর খাইএক পিএক দুখ রে বাবু হউ
নেহি হামর মরে ছুটু ভাই
আবু বিহানে ভালা মহল ভিতরে গউ
জেঠানি সে কহবে করই ।

অহিরে— দেউরা জে গেল হামর মইসি বাগাল রে বাবু হউ
নন্দলালকে বাঘে খালে জাইএ
নন্দকিসানকে ভালা বাঘে লেইএ গেলা গউ
দেউরানি ত কামিনি হামর ।

অহিরে— হামর হেলঁ ভালআ বসতি মহল রে বাবু হউ
হামর হেলঁ রাজা মাহাজন
হামর হেল দেখ বসতি মহল গউ
হামর হেলঁ কুটুম সজন ।

অহিরে— ডুভাক মাড়ে ধনি কামিনি খাটত রে বাবু হউ
আধুড় লুগা দেল পিঁধেলাই
এতনা বচন সুন্য জেঠানি কহল
সেহ দুখ গিরল হামর ।

অহিরে— এতনা লালিস ধনি নন্দলালকে কহই রে বাবু হউ
নন্দলালে কহে রে জবাব
রহ কি রহ ধনি মইসি বাথানে গউ
হামে জাউব মহল ভিতর ।

অহিরে— মহল ভিতরে নন্দ গেল চলল রে বাবু হউ
জাঁহা রহে আপন বড় ভাই
দাদাক পাসে নন্দ করেই জবান রে
সুনে দাদা বচন হামর ।

অহিৰে— নেহি জে লেবউ দাদা অন বড় ধন রে বাবু হউ
নেহি লেবউ বসতি মহল
নেহি জে লেবউ দাদা কুটুম সজন হউ
নেহি লেবউ রাজা মাহাজন।

অহিৰে— ডাকে কি ডাকে দাদা গাঁউএকে পাঁচ ভাই রে বাবু হউ
ডাকে দাদা গাঁউএক পনচ জন
সিরমনি মইসি ধনি হিঁছা ভাগে বাটব
জাকর ভাগে জেহ গিরি জাই।

অহিৰে— এতনা বচনে ভালা পাঁচ ভাই কে ডাকল বাবু হউ
চলি গেল মইসি বাথান
সাঠি স মইসি একঅ পাঁতাঞ ডাঁঢ়াল
দিঅ ভাই ত দু ধারে ডাঁঢ়াই।

অহিৰে— এসন খনে নন্দ ডাকবে করল রে বাবু হউ
মইসি গনে ইসারা জানাই
সিরমনি মইসি ধনি নন্দ বাঁটাঞ গিরল
লেটি খটি রহল ডাঁঢ়াই।

অহিৰে— লেটি খড়ি মইসি বড় ভাইএ পাউঅই রে বাবু হউ
নন্দলালে বুঝি রে ঠানই
নেহি রহব আর হরদিপি নগরে গউ
চলি জাউব করুঁগা নগর।

অহিৰে— হরদি নগর নন্দ ছাড়বে করল রে বাবু হউ
মইসি লেইএ নন্দ করল গমন
মইসি ধনি লেইএ নন্দ চলল রে বাবু হউ
নন্দ বহুঞ কহত বচন।
নেহি জে লেলে किसान অন বড় ধন গউ
নেহি লেলে বসতি মহল।

অহিৰে— নেহি জে লেলে বাবু রাজা মাহাজন রে বাবু হউ

কেইসে বিতবে দিন রাইত
এতনা বচন ধনি কহবে করল গউ
নন্দলালে দেলউ গউ জবান ।

অহিরে— অন ধন লাগে ধনি ইজতি আঁধার রে বাবু হউ
অন ধন লাগে কাঁসি ফুল
মইসিকা থিরে হেতউ অন বড় ধন গউ
মইসিক খাতির রাজা মাহাজন ।

অহিরে— মইসিক খাতিরে হেতউ বসতি মহল রে বাবু হউ
মইসিক খাতির বসতি মহল
করুঁগা নগর নন্দ গেল চলল রে
উঁহা জাইকে সিঁআইড় খুঁটই ।

অহিরে— বসতি সিঁআইড় নন্দ খুঁটবে করই রে বাবু হউ
আণ্ড পেছু সিঁআইড় খুঁটই
আড়ে না দউড়ে নন্দই সিঁআইড় খুঁটই রে বাবু হউ
পুরুব মুহে রাখল দুআইর ।
বাহারাইতে হেউএ মইসিক সুরুজ ডঁড়বত গউ
সামাঅইতে সিরে ডঁড়বত ।

অহিরে— দুখ দুহইএ নন্দ দহি জমাউঅই রে বাবু হউ
ঘিউএ করত বিরাজমান
বাড়ইতে নন্দ লাখ পঁচাস রে
গরখি হেউঅই সিঁগালাখা গাই ।

অহিরে— দিনে জে দিনে নন্দ বাড়বে করই রে বাবু হউ
বাড়ি গেলই পরবত পরমান
বাড়ইতে বাড়ল নন্দ পরবত পরমান রে
ধন মদে হেলা নন্দমাতুআর ।
নন্দেক বহু বেটি ধন মদে মাতল
নেহি চিনহে কুটুম সমাজ ।

অহিরে— নেহি চিনহই ভালা ভাট ভিখারি রে বাবু হউ
নেহি চিনহইএ বামুন বইসটম
ছারাক ছুরুক ভালা গহাইল বাঢ়ত রে
একঅ কুনে রাখে সমটাই।

অহিরে— গঁগা গহাইলে ভালা থুঁক খাঁখাইর ফেলইরে বাবু হউ
খাম খুঁটাঞ সিঁঘন পুছই
ছারাক ছুরুক গহাইল বাঢ়ই রে বাবু হউ
ছাঁছে গঁজি বাঢ়ইন রাখই।
সিরমনি মইসি ধনি সামাবে করত গউ
মইসি সিরে বাঢ়িন লাগি জাই।

অহিরে— এতেক না ভালা মইসি দুখ না ভেলই গউ
মনে মনে করেই গহাইর
হামর খাতিরে নন্দ বাঢ়বে করলে রে
ধন মদে গেল রে মাতাই।

অহিরে— এসন খনে মইসি বুইধ জে ঠানেই রে বাবু হউ
গহাইলে ত কাঁদে উভরাই
রাতি আঁধারে ধনি গহাইল ভিতরে গঅ
মইসি ধনি কাঁদে ঢর ঢর।

অহিরে— কাঁদি ন কাঁদি ধনি বুইধ ঠানল রে বাবু হউ
গরইআকে করল সৈঁউরন
গরইআ গঁসাইকে ধনি করল সৈঁউরন গঅ
গরইআ ত আউল চলল।

অহিরে— গঁগা গহাইলে গরইআ আউল চলল রে বাবু হউ
মইসিকে দেলউ দরসন
এসন খনে মইসি করল লালিস গউ
সুনে ঠাকুর বচন হামর।

অহিরে— ধনেক মদে নন্দ হেলঅ মাতুআর রে বাবু হউ

নন্দলালকে করহ কাঁগাল
চল কি চল ঠাকুর বন রাগাই রে
নন্দলালকে করবউ কাঁগাল ।
এতনা বচন ধনি গরইআকে কহেই গউ
গরইআও ত করল জবান ।

অহিরে— কেইসে ছাড়ব হামে নন্দ গহালি রে বাবু হউ
নন্দলালে পুজা রে করই
বছরে বছরে নন্দ পুজা পাঠ করহ গউ
পুজা সেবা করত হামর ।

অহিরে— দুধেকে ঘাটরা নন্দ মুড়ে চাপাই দেহ রে বাবু হউ
বলি দেতউ কুঁআরি ছাগেইর
নেহি ছাড়ব হামে নন্দ গহাইল গউ
নেহি জাবউ বনে রাগাই ।

অহিরে— এতনা বচনে মইসি করত জবাব রে বাবু হউ
গরইআকে দেলঅ গ সুনাই
হামর খাতিরে নন্দই পুজা পাঠ করত
হামর খাতির পঁঠরি ছাগইর ।

অহিরে— হামর খাতিরে দেত দুধেকে ঘাটরা রে বাবু হউ
না রহলে দেতউ চুলহাক পাঁস
এতনা বচন ধনি কহবে করল গউ
গরইআ ত করল সিকার ।

অহিরে— কনঅ জে দিএ ধনি জাবে রাগি রুসি রে বাবু হউ
নন্দলালে আনত ঘুরাই
এতনা বচন ঠাকুর কহবে করল গউ
মইসি ধনি করলে জবান ।

অহিরে— পড়ল কাতিক মাস আমাবইসাক রাতি রে বাবু হউ
সেহ রাতিও জাউঅব রাগাই

মদেহি মাসে নন্দ হেতট মাটুআর রে বাবু হউ
বহু বেটি জাউঅত দুমহি ।

ভতুআ বাগালঅ ঘর চলি জাতট গউ
নন্দাক বেটা জাতউ জাগরন ।

অহিরে— সেহ সমইএ ঠাকুর করব সেউরন রে বাবু হউ
সেহ রাতিএ জাউঅব রাগাই
পড়ল কাতিক মাস আমাবইসা লাগল
মইসি ধনিক মনে গিরি জাই ।

অহিরে— রাতি আঁধারে মইসি গরইআ সেউরইঅ রে বাবু হউ
গরইআ ত আউল চলল
সাঠি স মইসি খলবে করল রে বাবু হউ
মহল সে বাহারে জাই ।
মইসিকা সঁগে গরইআ জাহ চললা গউ
গঁসাই রাইএ খলে খেনুগাই ।

অহিরে— সিঁগা লাখা পাল ভালা গসাএ রাইএ খলে রে বাবু হউ
মহলেসে দেলঁঅ বাহিরাই
নগর বাহিরে মইসি ঠমকি ডাঁঢাল গউ
গরইআএ ত করল পছড়ন ।

অহিরে— কনঅ খাতিরে ধনি রহলে ডাঁড়াই রে বাবু হউ
মনে গিরই নন্দ কিসান
এসন খনে মইসি করত জবান গউ
সুনে ঠাকুর অরথি লাগাই ।

অহিরে— নেহি মনে গিরেই হামর নন্দ মহল রে বাবু হউ
নেহি মনে নন্দ কিসান
মহল ভিতরে রাহে বাছুর কড়রু গউ
দুধা বিনা মরত বুরাই ।

অহিরে— কড়রু বাছুর রাহে মহল ভিতরে রে বাবু হউ

বাছুর কড়রু দেহ গ ভিড়কাই
এতনা বচনে ঠাকুর বাছুর কড়রু আনে গউ
মাইএক সঙ্গে দেল গ ভিড়কাই।

অহিরে— চারি জজন দিঘে গেলা চললে রে বাবু হউ
মইসি ধনি গেল গউ রাগাই।
হেরি হেরি মইসি ধনি আণ্ড আণ্ড চলেই গউ
পেছু পেছু খেড়ি লেড়ি জাই।

অহিরে— লেড়ি খেড়ি মইসি পেছু লাগি জাহ রে বাবু হউ
লেড়ি খড়ি ভাঁইজ রে মেটাই
লেড়ি খড়ি মইসি ধনি ভাঁইজ মেটাই দেউঅই রে
জেসে নন্দই না পাই বানার।

অহিরে— চারি পহরে রাতি বিতি গেলাঞ রে বাবু হউ
হেইএ গেলাঞ ফরিছ বিহান
ফরিছ বিহানে নন্দা পালক লে উঠল
চলি গেল মইসি গহাইল।

অহিরে— মইসি গহাইলে নন্দা মইসি নেহি পাউঅই রে বাবু হউ
চলি গেলা গেইআ ধনিক গহাইল
গংগা গহাইলে দেখা গেইআ নেহি পাউঅল
নন্দা তবে মনে রে সঁচই।
সিঁগালাখা পাল আর সাঠি সুরহি রে
মইসি ধনি চরেন্ লেইএ জাই।

অহিরে— আঁগিনাকা মাঝে নন্দ ঘুরবে করইরে বাবু হউ
আঁগনাই ত গিরবে করই
মইসি ভাভনাই নন্দ উঁঝাটি গিরইএ গউ
কাঁদি কাঁদি গড়াগড়ি জাই।

অহিরে— নন্দ কিসান লাগেই বুঢ়া মানুস রে বাবু হউ
কাঁদি কাঁদি আঁগা হিলি জাই

চরিকে ভিতে নন্দ লক জে ভেজই রে বাবু হউ
 নেহি মিলে মইসিকে বানার ।
 দিনে জে দিনে নন্দ হেলঅ কাঁগাল গউ
 নেহি মিলে তেল জল পান ।
 অহিরে— ভাতুআ বাগাল ঘারে চলি গেলা রে বাবু হউ
 নন্দ পুতাঞ বুইধ রে ঠানই
 নন্দকে পুতা দেখা লমপট ডিগর রে
 চলি গেলাই আপন সসুর ঘার ।
 অহিরে— নন্দ কিসান ভালা বিপদে গিরি গেল রে বাবু হউ
 নেহি জুটই তেল জল পান
 বারঅ বছর নন্দা কাঁগাল হেইএ গেলা রে
 বহুত দুখেঁ কাটই দিনরাইত ।
 অহিরে— বছরে বছরে পরব ঘুরইএ রে বাবু হউ
 তাউএ নন্দাই পুজা না ছাড়ই
 বছরে বছরে নন্দাই পাঘা পুজা করইএ
 তাউএ নন্দাই পরব না ছাড়ই ।
 অহিরে— বারঅ বছর নন্দাই পাঘা পুজা করই রে বাবু হউ
 পুজাক খাতির ঘটে অঘটন
 বন ভিতরে দেখা ঘটে অঘটন গউ
 মইসি ধনিক ঘটে অঘটন ।
 অহিরে— সিমলা রগে ভালা বাছুর কড়রু রে বাবু হউ
 সিমলা রগে হেউঅই অচেতন ।
 অহিরে— সিমলা রগে ভালা বাছুর কড়রু রে বাবু হউ
 সিমলা বাতে হেউঅই অচেতন
 সিমলা রগে মরে বাছুর কড়রু রে
 মাঞ দুধ নেহি করেই পিআন ।
 অহিরে— বাছুর কড়রু ভালা দুধ নেহি পিএ রে বাবু হউ

দুধ ভরে থন ফাটি জাই
বনেক ভিতরে মইসি বিপদে গিরল রে
নন্দাকে ত মনে গিরি জাই।

অহিরে— গরইআ গঁসাইকে মইসি দেল সুনাইএ রে বাবু হউ
সুনা ঠাকুর বচন হামর
জাহ কি জাহ ঠাকুর নন্দ মহল গউ
নন্দই জানই সিমলাক অসধ।

অহিরে— পুজাক খাতিরে ভালা অঘটন ঘটেই রে বাবু হউ
মইসি ধনি কহল বচন
কনঅ ঢেসনাঞ জাউঅব নন্দ মহল গউ
মনে মনে বুঝি জে না পাই।

অহিরে— এসন খনে গরইআ করল উপাই রে বাবু হউ
সাজি গেলা বসতি নগর
গনক ঠাকুর ভেসে ধরবে করল গউ
চলি গেলা নন্দকে মহল।

অহিরে— কাঁখে গঁজল ঠাকুর পাঁথি না পাঁজি রে বাবু হউ
ধরি লেলউ গনকেরি ভেস
গনক ঠাকুর ভেস করল ধারন হউ
ঠেঁগা ঠকি ঠকি চলি জাই।

অহিরে— নন্দ মহলে ঠাকুর গেলা চলি রে বাবু হউ
নন্দলালকে ডাকি অভরাই
দেহ কি দেহ নন্দ তেল জল পান রে
হামে আবু কুটুম তহর।

অহিরে— এতনা বচন ঠাকুর কহবে করলে রে বাবু হউ
নন্দলালে কহবে করই
কাঁহা পাউঅব ঠাকুর তেল জল পান গউ
কিআ দেইএ করব বিদাই।

অহিরে— এতনা বচন ঠাকুর কহবে করলে রে বাবু হউ
নন্দলালে কহবে করই
কাঁহা পাউঅব ঠাকুর তেল জল পান গউ
কিআ দেইএ করব বিদাই।

অহিরে— বার বছর হামে হেলঁ কাঁগাল রে বাবু হউ
নেহি জুটে তেল জল পান
বার বছর হামে আঁধা হেইএ রয়ে রে বাবু হউ
নজরে না করি দরসন।
এতনা বচন নন্দই কহবে করল গউ
গরইআঞ ত কহত বচন।

অহিরে— জাহ করি জাহ নন্দ মহল ভিতরে রে বাবু হউ
মিলি জাতো তেল জল পান
ঠেঁগা ঠঁকি ঠঁকি নন্দা ভিতর গেলা রে
দেখহ মাহা অজগর।

অহিরে— অন বড় ধন নন্দ আবু দেখে পাই রে বাবু হউ
দুধ দহি সভে মিলি জাই
চিড়া কা কুমে নন্দ চিড়া মিলি জাই গউ
গুড়েক কুমে গুড় মিলি জাই।

অহিরে— মহল ভিতরে নন্দ করে বিরাজমান রে বাবু হউ
আবু নন্দই দেখে রে পাউঅল
এতনা দেখিকে নন্দই মহল ছাড়ল রে
চলি গেলা ঠাকুরেকর পাস।

অহিরে— ঠাকুরেক গড়ে ধরি গড়াগড়ি দেই রে বাবু হউ
গরইআকে কহত বচন
তঁহি জে লাগিস ঠাকুর কনঅ মাহাজন গউ
পাতা চিতা দেবে গো ছুআই।

অহিরে— গরইআ গড়ে ধরি গড়াগড়ি দেই রে বাবু হউ

গরইআঞ ত কহবে করল

মঞ জে লাগি নন্দ গরইআ ঠাকুর রে বাবু হউ
হামর সাঁগে লছমি রে ঘুরই।

হামর সাঁগে লছমি মহলে ঘুরল রে
হামি লাগি গরইআ ঠাকুর।

অহিরে— বার বছর নন্দ পাঘা পুজা করলে বাবু হউ
তাকর খাতির আউঅল চলল
হামর সাঁগে নন্দ চলি চলি জাহ রে
চলি জাউঅব বনেক ভিতর।

অহিরে— মইসি গড়ে ধরি গড়াগড়ি দেবে রে বাবু হউ
দস মিনহা করত খেমা।
এসন সমইএ ঠাকুর আগু আগু চলই গউ
নন্দলাল ত পেছু পেছু জাই।

অহিরে— বনেক ভিতরে নন্দ গেল চলি রে বাবু হউ
জাঁহা রহে সিঁগালাখা পাল
সিঁগালাখা পাল আর মইসি ধনি রহে গউ
তাঁহা নন্দত জাইএ রে পঁহচই

অহিরে— গড় লাগইত ভেস মইসি গড়ে গউ
নন্দলাল গড়াগড়ি জাই
নন্দকে দেখিকে মইসি কহবে করত রে বাবু হউ
চালে জাউঅব বসতি নগর।
সুন কি সুন নন্দ নজরে দেখঁ রে
বাছুর কড়রু কেসে অচেতন।

অহিরে— সিমলা বাতে ভালো বাছুরি কড়রু রে বাবু হউ
দুধা ভরে থন ফাটি জাই
এসন সমইএ নন্দ দাউআই বনাল রে
বাছুরিকে মুড়ে রে লাগাই।

অহিরে— বাছুরি মুড়ে দাউঅহি লাগাই সেল রে বাবু হউ
মনতর ফুঁকি ঝাড়বে করই
বাছুরি কড়রু মুড়ে হাঁথ বুলাই সেল রে
মনতর ফুঁকি রগ চলি জাই
ঝাড়ি ফুঁড়ি সিমলা রগ ভাল করল রে
বাছুরি মুহে দুখা খাই।

অহিরে— আগে ন আগে মইসি ঘুরি জাই রে বাবু হউ
পেছুই লাগি চলেই নন্দলাল
মইসিকর পিঠে ভালা গরইআ ঠাকুর গউ
গেইআক পিঠে জড়ে জড়আইর।

অহিরে— গেইআ ধনিক পিঠে ভালা গুসাঞরাই চড়েই রে বাবু হউ
ঘুরি আইল নন্দকে ঘার
বাড়ে বাঢ়ল নন্দ লাখ পঁচাস রে
উখি ধনি সিঁগালাখা দহাই।
জাহ জড়লম বিরহ গাহলম বাবু হউ
মুহে লিহা গরইআকা নাম।

সিরিগাই বিরহ

অহিরে— এহ পারেঁ গঁগা অহ পারে জবুনা রে বাবু হউ
মইখঅ গঁগাঞ চরই সিরিগাই
সাত দিনা সাতঅ রাতি পানি বরসতঅ হউ
সিরি গেইআ রহল টেকাই ।

অহিরে— কিআ করত ভালা সিরি গেইআ ভাভে লাগল বাবু হউ
কেসে হামে ঘুরব গলা ঘার
গড়অ না চলএ বাটঅ না সুঝাইএ হউ
পানি বরসএ নিরাধার ।

অহিরে— সেহ বাটে আউঅত একঅ পথরি রে বাবু হউ
সিরি গেইআঞ দেখিকে ডাকই
সুনে রে সুনে বাছা বাটেকে পথরি রে
মরঅ বানার লেগি দে গলা ঘার ।।

অহিরে— সিরি গাইএক কথা সুনি পথরিঞ কহত রে বাবু হউ
হামে ত জাইঁ সসুর ঘার
হামে নেহি পারবঅ হামে নেহি জাউঅব হউ
বানার লেইএ তরঅ গালাঘার ।

অহিরে— পথরি কা কথা সুনি কহই সিরি গেইআঞ রে বাবু হউ
সুনি লিহা হামরি বচন
মরঅ কথা রাখলে হেবে ধনি মান রে
নি সুনলে সবঁসে ঢাহান ?

অহিরে— গেইআকে বচন সুনি কহই পথরি রে বাবু হউ
সাপানত না করে গেইআ মাঞ
তরঅ বানারঅ লেইএ হামে জাউঅব গউ
মনেক কিরখুট গেলি জে পঁছাই ।।

অহিরে— কনঅ নগরে তহর গলাঘারা রে বাবু হউ

কিনা লাগই গলাকেরি নাম

এক মনে জাউঅব তহর বানার সেইএ গউ

গিরি রহক সসুর ঘারেক কাম।

অহিরে— সুনে জে সুনে বাছা কান লাগাই রে বাবু হউ

হরদিপি নগরে গলা ঘার

নন্দ কিসান হেকে মরঅ গলাক নাম রে

তাকর বেটা ঠকইতা দুলাড় ॥

অহিরে— নেহি হামে দেখলাই হরদিপি নগর রে বাবু হউ

নেহি তঅ চিনই নন্দ নাম

কন বাটে জাউঅব গেইআ কেসে হামে চিনহবঅ গউ

হরদিপি নগরে তহর গলা ঘার।

অহিরে— কারি পিপড়েক বন ধরি উজু চলি জাবে রে বাবু হউ

পঁহচি জাবে হরদিপি নগর

গবর ডিঘেক ডুঁগরি দেখি চিনহবে ঘারা রে

পিঁধনে চিনহবে গলা মর।

অহিরে— কারি পিপড়েক বনে মঞ কেসে জাউঅব রে বাবু হউ

নাম সুনি জিআ জে ধক ধক

সেহ বাটে জাব নিহি সুনে সিরি গেইআ গউ

ভুখল বাঘে জিউ জে মারতাক ॥

অহিরে— মরঅ খেআনে তঁহি চলি জে জাবে রে বাবু হউ

তরঅ গড়ে কাঁটাউ না গড়তউ

ভুখলঅ বাঘে তকে ভালি না ভালতউ রে

নি ফিকির মনে চলি জাঞ।

অহিরে— চলি গেলা পথরিআ সিরি গেইআক খেআনে রে বাবু হউ

ডেগে ডেগে খিআউঅল বাট

নেহি রে ভুখল বাঘা নেহি কনঅ ডর রে

নেহি কনঅ বিপদঅ ঝনঝাট ॥

অহিরে— পঁহচলঅ বানার হরদিপি নগর রে বাবু হউ
পঁহচলঅ নন্দা কি দুআইর
সুনে হউ নন্দা তরঅ সিরি গেইআ হউ
মইধঅ গঁগাঞ আহি জে টেকাই ।

অহিরে— বানারিআক হাঁক সুনি ঘারা ভিতর নন্দারে বাবু হউ
পুতহকে कहलअ हँक़াই
दुआइरे भिखारि आहे भिख दिहा गउ
चाँड़े माड़े करिहिं विदाइ ।।

अहिरें— ससुरेका कथा सुनि नन्दাকে पुतह रे बाबु हउ
भिखअ लेइए आउअल दुआइर
भिखअ देखि बानारिआ चमकि उठलअ गउ
चाँड़े माड़े फरकि डाँछाइ ।।

अहिरें— हामे जे नह बाछा भाँट भिखारि रे बाबु हउ
नहअ हामे पेटेके काँगल
सिरमनि গেइआ तहर मईधअ गँगाঞ आहिरें
सेह बानार देलँ जे पँहछाइ ।।

अहिरें— सुना जे सुना ससुर सिरिमनि গেइआरे बाबु हउ
मईध गँगाঞ आहि जे टেকाइ
सेह बानार लेइए आउलअ पथरि गउ
चाँड़ा करि तरा चलि जाए ।।

अहिरें— मरअ जे आहत भाला सिँगलाखा बइना रे बाबु हउ
एक গেइआ गँगाঞ देलेइ दान
हामे नेहि आने जावउ सेह बुढि গেइआ गउ
घारेँ हामर लाखअ टाकाक काम ।

अहिरें— ससुराका कथा सुनि नन्दাকে पुतह रे बाबु हउ
ईँडकि गेलि आपन सँइआ ठिन
सुना हउ सुना सएग सिरमनि গেइआ गउ

মইধঅ গঁগাঞ আহি জে টেকাই ।।

অহিৰে— নন্দাকে বেটা ভাঙ্গা কহতঅ রে বাবু হউ
মরঅ বাপেক সিঁগালাগা গাই
একঅ বুঢ়ি গেইআ হামে সুগনিকে দেল গট
মর ধন ত নি জাতেইক সিরাই ।।

অহিৰে— নন্দাকে সঞআ সুনি কাঁদে লাগলঅ রে বাবু হউ
বেটা লাতি কিআ ধনে রে ধাখাই
জাকর লাগি ধন দউলত দেখঅতঅ নজরে গট
অকেই আইজ বিসরল জাই ।

অহিৰে— নন্দাকে মাঞ ভালা কাঁদি কাঁদি খুৱে রে বাবু হউ
বকনাকে দেলেইক রে জানাই
সুনে রে সুনে বাছা তর মাঞ সিরমনি গেইআ রে
মইধঅ গঁগাঞ আহি রে টেকাই ।

অহিৰে— মরঅ বেটা মরঅ লাতি আনে নেহি জাত রে বাবু হউ
একাই কেসে জাম রে হামে
কাৰি পিঁপড়েক বনে কেসে পাইৰাব গউ
ভুখল বাঘাঞ মারত পৰান ।।

অহিৰে— বকনাহি কহই ভালা সুনে বুঢ়ি মাঞ রে বাবু হউ
খলি দে মর গড়ে কি বাঁধন
তহরঅ সঁগে হামে মাঞ আনে জাউঅব গউ
মাঞ বিনু আঁধাৰি জিবন ।

অহিৰে— কহতঅ বুঢ়ি মাঞ তঞ ছুট ছুটআ রে বাবু হউ
কেসে হামে লেগব তকে সঁগ
কাৰি পিঁপড়েক বনে বড়ি জে ডর গউ
ভুখল বাঘা হেঁকত ডহর ।।

অহিৰে— কহতঅ অরুন ভাই সুনে বুঢ়ি মাঞ রে বাবু হউ
ভগবানে করহঁ সোঁউরন

বারঅ হাঁধেক সিঁগা লেবো বারঅ হাঁথ বাঢ়ব গউ
ভুখল বাঘেক ডরেক নি কারন ।।

অহিরে— এতেক সুনি বুঢ়ি মাঞ চিউড়া গুড় লেউঅলঅ রে বাবু হউ
বুঢ়া বাপেক করিকে জহার
বেটাকে নি জানাউলঅ নাतिकে নি জানাউঅল গউ
বকনা সাঁগে হেলি রে বাহার ।।

অহিরে— গড়ে গড়ে পঁহচলঅ কারি পিঁপড়েক বন রে বাবু হউ
বুঢ়ি মাঞ ত ডরে থরথরাই
গড় না উঠএ কাথা না সরইএ গউ
বকনাকে ত ধরলঅ আঁকড়াই ।।

অহিরে— বকনাহিঁ কহঅএ সুনে বুঢ়ি মাঞ রে বাবু হউ
তঁহি হামর পেট কলে চাল
হামে রহইতে তর কনঅ নিখউ ডর গউ
তকে হামে লেইএ চলি জাব ।।

অহিরে— জাঅইতে জাঅইতে ভালা ভুখল বাঘে পাউঅই রে বাবু হউ
বকনা ত চলই নি জালাই
পেট করে চলই বুঢ়ি আগু পেছু ভালি গউ
বুঢ়া বাপেক সোঁউরই সারাখন ।

অহিরে— এহ আড়রা ডেগইএ অহ আড়রা ডেগই রে বাবু হউ
বাঘাক ত সাঁহাস না কুলাই
বারঅ হাঁথ সিঁঘা দেখি ডর লাগত গউ
কিনা করই ভাভি নেহি পাই ।।

অহিরে— ঘনেক আগু ঘনেক পেছু চলই ভুখল বাঘা রে বাবু হউ
বকনা তঅ চলই মুড় উঁচাই
দিনা সিরাই রাতি হেল রাতি বিতি দিনা গউ
বাঘাক তঅ নেহি কনঅ চাইল ।

অহিরে— জখন বনেকেরি বরাবইরঅ হেলেইক রে বাবু হউ

বাঘাক মনে হেউঅল দিক্কার
কেসন রাজা হামে কেসন তাখড়অ গউ
বাছুরিক ডরে মরি জাই ॥

অহিরে— এতেকঅ সঁচি মনে বাঘাঞ ঝপঅটলঅ রে বাবু হউ
বকনাঞ তঅ মারলঅ সিঁগ
তিনঅ চেডু ধঅ ডুঁটুঞ লটকি রহল গউ
একঅ চেডু সিঁঘাই গাঁথাই গেল ॥

অহিরে— বকনাকে সিঁঘাক গুঁতাঞ বাঘা মরলঅ রে বাবু হউ
বুঢ়ি মাঞে গাডলঅ নিকাস
কারি পিঁপড়অ বন সিরাইএ গেল গউ
পঁহচি গেলা গঁগাকে কিনার ॥

অহিরে— গঁগা কিনারে পঁহচি বকনা বুঢ়িঞ দেখই রে বাবু হউ
সিরি গেইআ বালিঞ রে তপাই
দেখি পাউঅত খালি মুড়েকে দিঅ সিঁঘা গউ
দেখি চইখ লর না টেকাই ॥

অহিরে— কাঁদতঅ নন্দা মাঞে কাঁদই সিরি গেইআ রে বাবু হউ
তপল বালিক ভিতরলে কইসে করিকে গউ
মাঞেকে মর করব উতধার ॥

অহিরে— কেসনঅ গেইআ ভালা কেসনঅ হাল রে বাবু হউ
দেখি জিআ দুখে ভরি জাই
ইঁচরি আখড়াই বুঢ়ি বালিক চুঁড় গউ
সিরি গেইআক বাঁচাউ ত পরান ॥

অহিরে— সিরি গেইআকে দুলাড় হাঁঠু গাদি বসই রে বাবু হউ
সিঁঘা দেইএ বালি তিড়ি দেল
বাঁচাউঅল আপন মাঞে বড়ি বির মনে গউ
বুঢ়ি মাঞে গাত ঝাড়ি দেল ॥

অহিরে— নাউআ জিবন পাইখুন কহই সিরি গেইআ রে বাবু হউ

সুনে বাছা বচন হামর
বুড়িকে দুইঅটা রাখিকে দেবে গউ
বাকি দুইঅ খাবে বাছা তঞ ॥

অহিরে— বকনাহি খাউঅল দিঅ বাটরে বাবু হউ
বুড়িকে ত দুইঅ রাখি দেল
বকনাক ভরল পেট ভরই বুড়িক মনঅ গউ
সুখল বালিঞ বান বহি গেল ॥

অহিরে— কহত সিরি গেইআঞ চালা এবে ঘারা রে বাবু হউ
বুড়িঞ কহেই ঘারা নিহি জাব
একে একে কহে লাগল আঁখিআকা লরে গউ
আপন বেটা লাতিকে সভাব ॥

অহিরে— সিরি গেইআঞ কহেই তবে সুনে বুড়ি গলিন রে বাবু হউ
বিজুবনে করবঅ বসকইত
মরঅ ছউআ পুতা সভে ডহরাই আনব গউ
নন্দা ঘারা করবঅ সুধা ॥

অহিরে— তখনঅ সিরি গেইআঞ বকনাকে কহত রে বাবু হউ
সুনে বাছা বচন হামর
নন্দাকে ঘারা জাইকে মরঅ জতেক ধনে গউ
সভেকে তঞ আনবে ডহরাই ॥

অহিরে— মাঞেকে বচন সুনি সুপুতা বকনারে বাবু হউ
চলি গেলা নন্দাকে ঠহর
অরুন বরুনে কহি কহলঅ সভেকে গউ
একে একে মাঞেকে বচন ॥

অহিরে— এতেক সুনি তবে সিরি গাইএক পুতা রে বাবু হউ
ছাড়ি চলই নন্দাকে ঠহর
সাতঅ দিন সাতঅ রাতি চলতঅ সভে গউ
পঁহটি গেলা জাঁহা সিরি গাই ॥

অহিরে— আপন পুতা দেখি সিরি গেহিআক রে বাবু হউ
রিখে রঁগে নাচতঅ অনতর
লরৈ ছপঅ ছপঅ আঁখি পুছতঅ বানার গটি
চুমা খাইএ করত আদর ॥

অহিরে— নন্দাকে ঘারা ছাড়ি লকখি গিআন মাঞ রে বাবু হউ
চলি গেলা জাঁহা সিরি গাই
নন্দাকে মাঞ ভাই রে ধূপ ধুনা জরাই গটি
বিজুবনে করল খাপন ॥

অহিরে— নন্দাকে ঘারৈ ভাই আলকখি বসই রে বাবু হউ
ভরল ধনে পতনি লাগি গেল
নন্দা কাঁদত ভালা হাই হাই করি গউ
হাইরে মর বিধি নাগা হেইল ॥

অহিরে— কিনা দসৈ লছমি মকে ছাড়ল রে বাবু হউ
অঢেল ধন গেলি রে বহাই
জেহঅ মুহে দুখা ঘিউ ছলকি বুলত হউ
সেহ মুহে মাড় না কুলাই ॥

অহিরে— ধন হেরাইকে নন্দা গিআন হারাল রে বাবু হউ
কাঁদে লাগতঅ রাতি দিন
কেসে হামে বাঁচব লকখি ছাড়া হেইএ গউ
ছিটল ফাটল ইঁধন পিঁধন ॥

অহিরে— বহুত দুখে ভালা দিনঅ বিতই রে বাবু হউ
দিনে খালে রাতিঞ রে উপাস
ধনেকে রাজা আবু মাড়েকে ভিখারি হউ
কপাল হাঁসতাউএ বারে বার ॥

অহিরে— কিনা করতঅ নন্দা আপন পুতা ডাকি রে বাবু হউ
চইখেক লরৈ কহই রে বচন
সুনে রে সুনে বাছা ঠকইতা দুলাড় রে

টিটা ছাড়ি চালা জে জাহার ।।

অহিরে— বাপেকে বচন সুনি কহই তবে ঠকইতাইরে বাবু হউ
নেহি ভাঙ হেতি এসন হাল
কিআ দসেঁ বাবু ভিখারিকর দসা গউ
টুটি নিহি পাউতঞ জে কিনার ।।

অহিরে— ভাভইতে ভাভইতে নন্দা সঁচলঅ রে বাবু হউ
ঘারেক জেনি গনাত লক্খি
জেনিরাকর আচার দসেঁ ছাড়ি মর টিটা গউ
লক্খি মাঞ গেলাহি চলি ।।

অহিরে— বহু পুতঙ্কে ডাকি কহই তবে নন্দাঞ রে বাবু হউ
তরাই হেকিহা ঘারেকর সনি
তহরাকর আচার দসেঁ লক্খি হেলঁ ছাড়া গউ
নি করিহা লক্খি জেনিক কাম ।।

অহিরে— লরেঁ ঝর ঝর আঁখি কহই নন্দাক বহুঞরে বাবু হউ
হামরাক দসঅ দিহা না ফাঁকাই
তহরা বাপ বেটাক দসেঁ এসন হামরাক হাল গউ
আপন দসঅ টুটি দেখাহান ।।

অহিরে— ধনেক ফুটানিঞ তহরা ভুললাইহা সিরি গেইআ বাবু হউ
বিসরঅলাইহা আদরেকা মাঞ
সেহ দসে আঝু এসন দসা গউ
মনে মনে ঠানি দেখাহান ।।

অহিরে— এসন বচন সুনি নন্দাক বিঁধল রে বাবু হউ
টুটি গেলেইক মনেকে ভেআর
রুখা সুখা আঁখি নন্দাক লরেঁ ঝরঅ ঝরঅ গউ
বেটাকে তঅ ধরলেক আঁকড়াঞ

অহিরে— ঘারেক লক্খি সিরি গেইআ গঁগাঞ টেকাউলি রে বাবু হউ
ধনেক ফুটানিঞ আনে নিহি গেল

আপন বুড়ি মাঞেক কথাউ বিনসরি গেল গউ
নি রাখল খজ পঁছার ॥

অহিরে— আইলেক বাঁদনা পরব গরইআ পুজা রে বাবু হউ
নন্দাকর সুধা জে গহাইল
গাই গরু বাছুর বিনু কনে লেই দুবি ধান গউ
কাকর লাগি চক ঘার আগনাঞ ॥

অহিরে— কাকরঅ লাগি করব কাঁচি জিঅরি রে বাবু হউ
কাকর লাগি গহাইল জাগর
আঁখি লরে ভাঁসইএ নন্দাকে ঘারা গউ
কেসে করি আউতেইক সেহ দিন ॥

অহিরে— বড়ি কসটে বিতএ নন্দাকে দিনা রে বাবু হউ
নেহি মিলেক সুখে কে কিনার
বারঅ বছরঅ ভাইরে বাঁদনা পরবে গউ
পাঘা পুজা করত নন্দাঞ ॥

অহিরে— একঅ দিন জে ভালা নন্দাকে পুতহুঞ রে বাবু হউ
বাঢ়াসঢ়া ফেঁকে জাই কুধা
নিখরি দেখইএ গরুকে দিঅ সিঁঘা গউ
গবর কুধাই আহেক জে ডাঁঢ়াই ॥

অহিরে— পেছিআ তফাতে ফেঁকি নন্দাকে পুতহুঞ রে বাবু হউ
গবর ইঁচরি দেখই নিখঅরি
দেখঅত ঘারেকর কুইলা বুঢ়া গরু গউ
কবেলে আহে জে তপাই ॥

অহিরে— নন্দাকে পুতহুই ঘারা ওসটি ডাকই রে বাবু হউ
দেখাই দেলি কুইলা গরুটা
বারঅ বছর ভালা তপাই রহল গউ
এতেক দিনেউ না হেলি নজর ॥

অহিরে— তখন নন্দাক ঘার ওসটি কুইলা বুঢ়া গরুকেরে বাবু হউ

জতন কইএ আনল বাহার

জতন কইএ ধউআই পঁছাই সিঁঘে দেলা তেল গউ

খাই দেলা ঘাঁস পঁউআর খইল ।।

অহিরে— কুইলা বুঢ়াকে পাইকে নন্দাকে ঘারা রে বাবু হউ

ভুলি গেলা মনেকে বেদন

করত গরইআ পুজা রিঝাল মনে গউ

কুইলা বুঢ়াকে বরনে সাজাই ।।

অহিরে— তেলা সিঁদুরে কুইলাক সিঁঘা ঝলমলঅ রে বাবু হউ

কাপারে তঅ সাজলঅ মেডুঅইর ।

নন্দাকে বহুঞ আরঅ অকর পুতহুঞ গউ

দিআ দুব ধানে রে পুজাই ।।

অহিরে— নন্দাকে মনে নিহি রহতঅ দুখ রে বাবু হউ

ভুখঅ পিআস চলি গেল

কুইলা বুঢ়াকে তবে পুছই আঁখি লরে গউ

সিরি গেইআ মাঞেকে বানার ।।

অহিরে— তহিঁ জে জানিস ভালা সভে বানার রে বাবু হউ

নেহরোঁ কইঁ কহি দে মকে

সিরি গেইআ অকর পুতা আর মরঅ মাঞ গউ

কনঅ নগরে করত বাস ।।

অহিরে— নন্দাকে দসা দেখি সুনি নেহর বচন রে বাবু হউ

কুইলা বুঢ়াঞ কহত বচন

বিজুবনে সিরি গাই জতেক ছউআ পুতা গউ

তর মাঞেকর সংগে করত বাস ।।

অহিরে— কুইলা বুঢ়াক গড় লাগি নন্দা আর ঠকইতা রে বাবু হউ

ডহরলঅ জাঁহা বিজু বন

পেছুঞ পেছুঞ ডহরলঅ সাসু পুতহু গউ

সিরি গেইআক করিকে ধেআন ।।

অহিৰে— তৰে কতেক খনেঁ ভালা বিজুবন পঁহচলঅ রে বাবু হউ
চলি গেলা জাঁহা সিরি গাই
দেখতঅ বুঢ়ি মাঞ আৱঅ গাই গৰু গউ
ৱিৰে ৱঁগে কালঅ বিতাই।।

অহিৰে— চাইৱঅ লক গিৰি দেলা সিরি গেইআক গড়ে রে বাবু হউ
আঁখিআ লৱে বহত বান
কহতঅ নেহৰেঁ দসঅ খেমি লিহিঁ গউ
নিহি তঅ না ৱাখব জিবন।।

অহিৰে— সিরি গেইআঞ কহেই তৰে হামে কেসে খমব বাবু হউ
খেমেক অধিকাৰি তহৰ মাঞ
তহৰ মাঞে জদি দসঅ খেমি লেউঅই গউ
হামৱা সভেকাই হঁ সিকাৱ।।

অহিৰে— তৰে তঅ চাইৱ জনা বুঢ়ি মাঞেক গড়ে গিৱল রে বাবু হউ
মাঞ বুঢ়িক হেলেইক রে দইআ।
খেমি দেলেইক তৰে সভে দসঅ কাম গউ
হাঁথে ধৰি ভুঁঞলে উঠাই।।

অহিৰে— আঁখি লৱ পঁছি নন্দাক মাঞ বুঢ়ি কহত রে বাবু হউ
ধনেক গৱব পাপেকে কাৱন
এহে কথা সেঁউৱনে ৱাখি চলবে ডহৰে গউ
লক্খি মাঞে নি ছাড়তউ ঘাৱ।।

অহিৰে— নন্দাহিঁ কহেই তৰে ভাঁগলাহি ভুল রে বাবু হউ
জিনগানিঞ না কৱব এসন
চালা সভেকাই তৱা পুৱনা বসতি গউ
এহে ত মৱ মনেকে বাসন।।

অহিৰে— তখনঅ সভে ভালা বিজুবন ছাড়ি রে বাবু হউ
ডহৱলঅ সভে নন্দাকি ঠহৱ
নন্দা কি ঘাৱ ভালা হেইএ গেলেইক আলা গউ

সুখ সানতি আগুকে নিআর ।।
অহিরে— ঘারা ঘুরি নন্দাঞ তবে করল গরইআ পুজা রে বাবু হউ
আরঅ করল কুটুমঅ ফলার
লক্খি মাঞ ঘুরি আইলি ধনে ভরই ঘারা গউ
সিরি গাইএক আসিস গুনে ।।

সিরি গাই কথা

অহিরে— আসিন পাইরাইএ দেখে কাত্তিক সামহাল রে বাবু হউ
গলিনি ত চলল নেইহর।

অহিরে— গঁগা গহালিএ গেইআ কাঁদন কাঁদই হউ
কাঁদই গেইআ অবর নইঅন।

অহিরে— না না কাঁদে না না থিজে ধবলি না গেইআ হউ
তরঅ গলিন আনবউ ঘুরাই।

অহিরে— একি কসা গেলি গলিন দুইঅ কসা গেলি হউ
তিনি কসাএ ঠমকি ডাঁটাই।

অহিরে— উঠন লে গলিন দেখে ঘুরে সে লাগল হউ
ঘুরই জেসন ঝড়অ রে বাসাত।

অহিরে— গঁগা গহাইলিএ গলিন সামাই ভালা গেলি হউ
গেইআ ধনিকে কহে রে লাগই।

অহিরে— না না কাঁদে না না থিজে ধবলি না গেইআ হউ
তরঅ গলিন আইল গঅ চলল।

অহিরে— গলিনেহিঁ দেতউ গেইআ তেলা সিঁদুরা হউ
গলাএ তরা করত মইলান।

অহিরে— নন্দঅ গআলা হেকউ বেড়ি ভাইগমান হউ
দুধে পুতে সমানে সমান।

অহিরে— কাঁহা পাউঅব হামে কাঠ না বাঁসঅ হউ
কাঁহা পাউঅব খেড়অ ঘাঁস।

অহিরে— কাঁহা পাউঅব হামে চিহড়অ লতা হউ
কেসে বাঁগলা করব তিআর।

অহিরে— পাহাড়েহিঁ আহউ দেখে কাঠঅ না বাঁস হউ
ডুঁগরিএ রহই খেড়অ ঘাঁস।

অহিরে— কেইসে আনবঅ হামে কাঠঅ না বাঁসঅ হউ
কেইসে আনবঅ খেড়অ ঘাঁস?

- অহিরে— কেইসে আনবঅ হামে চিহড়অ লতা হউ
কেইসে বাঁগলা করবঅ তিআর ।
- অহিরে— কাড়াকর গাডিঞ আনব কাঠঅ না বাঁসঅ হউ
গরুক্ষ গাডিঞ আনবউ খেড়অ ঘাঁস
- অহিরে— মুনিসঅ লাগাইএ আনব চিহড়অ লতা হউ
জড়অ বাঁগলা করবই তিআর ।
- অহিরে— নন্দাকর গেইআকর পুঁজি রহি গেলা হউ
সিঁগালাখা গেইআ রহি জাই ।
- অহিরে— উতত্রে দক্খিনে ননদঞ বাঁগলা টানলাই হউ
পুরুবে ত রাখলাই দুআইর ।
- অহিরে— বাহরাউঅইতে সামাউঅইতে
গেইআই সুরুজঅ ধেইআতে হউ
বাঢ়ি জাহ সিঁগালাখা গাই ।
- অহিরে— গেইআকর পুঁজি নন্দাক দেখেঁ বাঢ়ি গেলেই হউ
দুধে পুতে সমানে সমান ।
- অহিরে— বুরুহিরিক বনে ননদঞ গেইআ লেলেই জাতউ হউ
অহেঠিনেঞ করত গঠেইর ।
- অহিরে— নন্দ দেখেঁ বাগাল আর সাজি গেলাই হউ
গেইআকে ত চরাউএ লাগল ।
- অহিরে— হাঁথেইঁ লেলঅ নন্দঞ হাঁথা পাঁড়রি হউ
ভইড়ে ত কাঠেকা খড়ম ।
- অহিরে— মুড়েইঁ লেলঅ ননদঞ সারি সুগা পাগঅ হউ
অঁগে লেলঅ অঁগারে চাদর ।
- অহিরে— এহে তিআ করি নন্দ বাগাল সাজি গেলউ হউ
গেইআকে ত চরাউএ লাগই ।
- অহিরে— ভিনসারে উঠি নন্দঞ লেলে চলি জাহ হউ
বুরুহিরিক বনে লেইএ জাই ।

অহিরে— নন্দএ আর গেইআকে চরাউঅই বাখাউঅই হউ
 বেড়ি সুখে নন্দঅ রহি জাই।
 অহিরে— দেখে নন্দএ গটে দিনা গরু চরাই লেলেই হউ
 নেহি মারই দুভে কেরি সাজ।
 অহিরে— হাঁথেকর ইসারাই গরু ঘুরাই লেলউ হউ
 এসন দেখে করে রে লাগই।
 অহিরে— দেখে নন্দএ বার বছর গেইআ চরাউঅই হউ
 তবে গেইআ বাঢ়ি নাই রে জাই।
 অহিরে— বহুতঅ না দিনঅ নন্দএ গেইআকে চরাউলঅ হউ
 দুখে পুতে সমানে সমান।
 অহিরে— দেখে এহে তিআ করি দিনঅ বিতি জাহ হউ
 নন্দক বহু ঘারে রহি জাই।
 অহিরে— বাছুরিকে দেখে আর জতন করি লেহেই হউ
 মাড়অ পানি দেউএ রে লাগই।
 অহিরে— বহুতঅ দিনঅ দেখে গেইআকে চরাউল হউ
 বেড়ি সুখে দিনঅ গমি জাই।
 অহিরে— দেখে আর নন্দক বহুএ কহে সে লাগলই হউ
 সঞাকে ত কহে রে লাগল।
 অহিরে— সূনে ন সূনে সঞা বচনঅ হামর হউ
 সূনে তবে কানে ত অনাই।
 অহিরে— হামরাকর উমের আর হেইএ না গেলই হউ
 কেসে হামরা পারি নাইরে জাম।
 অহিরে— দিনে দিনে হামরাক আর উমের হেইএ গেলেই হউ
 হামরা আর দেবই গঅ সমুঝাই।
 অহিরে— দুবাই লালঅ নাম দেখে বেটাক রহি গেলই হউ
 বেটাকে ত ডাকি নাইরে লেই।
 অহিরে— সূনে না সূনে পুতা বচনঅ হামরঅ হউ

সূনে তবে কানে ত লাগাই।
 অহিরে— হামরাকর উমেইর পুতা হেইএ জে গেলি হউ
 তাঁহি পুতা লেবে গঅ সমঝাই।
 অহিরে— গেইআকে ত তাঁহি পুতা জতন করি লেবে হউ
 বইসল বইসল খাবে গুআ পান।
 অহিরে— বঝা বঝা ঘাঁসঅ তাঁহি আর দেইএ দেবে হউ
 গেইআকে ত ভুখে না মরেই।
 অহিরে— নন্দকর বহুঞ আর সমঝাই লাগলঅ হউ
 পুতহকে সমঝাঞ লাগই।
 অহিরে— নন্দকর বহুঞ দেখে ডাকি না লেল হউ
 পুতহকে ডাকি না রে লেল।
 অহিরে— সূনে না সূনে বহু বচনঅ হামর গউ
 সূনে তবে কানঅ জে লাগাই।
 অহিরে— বাছুরিকে তাঁহি মাঞ জতন করি জাবে গউ
 বইসল বইসল খাবে গুআ পান।
 অহিরে— এহে রকম করি দেখে সমঝাএ দেলঅ হউ
 বেটা বহুকে সমঝাএ দেল।
 অহিরে— বার ত বছরঅ দেখে গেইআ চরাই লেলঅ হউ
 নন্দঞ দেখে দেলঅ গঅ সমঝাই।
 অহিরে— এসে দুবাই লালঅ আর সমঝাএ লেল হউ
 ঘরকননা সমঝাএ লেল।
 অহিরে— দেখে তবে নন্দই আর সভে সমঝাই দেল হউ
 বেটা বহুকে সমঝাইএ দেল।
 অহিরে— গেইআ ধনি দেখে আর ভাভে জে লাগল হউ
 লউতন বাগাল হামরাক সাজি জাই।
 অহিরে— নন্দক সঙ্গে হামরাক আর কাটি নাইরে গেল হউ
 নন্দক দেখে উমেইর হেইএ জাই।

অহিৰে— নন্দকৰ আমলে হামৰা সুখেঁ রহলউ হউ
 বেড়ি সুখে দিনঅ গমি জাই।
 অহিৰে— এহে রকম গেইআ ধনি ভাভে সে লাগল হউ
 মনে মনে ভাভে রে লাগই।
 অহিৰে— আদ বাইসাম দেখেঁ ঘুমাঞ উঠতঅ হউ
 গেইআ দেখেঁ গহালিঞ রহই।
 অহিৰে— গহাইলিঞ ত গেইআ দেখেঁ আর রহি জাহ হউ
 আদ বাইসাম বেরাঞ উঠি জাই।
 অহিৰে— আদ বাইসাম বেরাঞ গরু খসাই লেহউ হউ
 লেইএ জাহ বুরুহিরিক বন।
 অহিৰে— টিকরে টিকরে দেখেঁ চরাই নাইরে লেহউ হউ
 গেইআ ধনি ভুখে রহি জাই।
 অহিৰে— নন্দকৰ বেটা হেকই বেড়ি বলিমানঅ হউ
 রগদি ঘুরাউঅই ধেনু গাই।
 অহিৰে— একে ঠিনে গঠঅ করি তবে রাখি লেহউ হউ
 মারই পুতাঞ সিরে সিরে ডাঁগ।
 অহিৰে— কনহ গেইআ কাছাই লড়কি চরতঅ হউ
 দউড়ি জাইএ ঠেঁগাবে করই।
 অহিৰে— এহে মতে তবে দিনঅ গমি জাহউ হউ
 গেইআ ধনি কাঁদে রে লাগই।
 অহিৰে— বেটাঞ বহুঞ দেখেঁ অনিঅম করই হউ
 বাছুরিকে সাঁতাউএ লাগই।
 অহিৰে— মাড়অ পানি তবে আর নেহি দেইএ লেহউ হউ
 জেঠিন বাঁধল উঠিন রহি জাই।
 অহিৰে— বেরা না ডুবইতে গেইআ খহড়াই নাই ত দেহউ হউ
 ঘাঁসঅ পঁউআর নেহি গঅ মুহাই।
 অহিৰে— বেটাক বহুঞ দেখেঁ আর অনিঅম করই হউ

বাছুরিকে সাঁথাউএ লাগই।
 অহিরে— জাঁঘঅ ভরি খালঅ দেখেঁ গহালিঞ রহলঅ হউ
 গেইআক বেড়ি দুখঅ লাগি জাই।
 অহিরে— বেড়ি গুমান ভালা আর হেইএ গেল হউ
 খামঅ খুঁটাঞ গবরঅ পঁছই।
 অহিরে— ঝেঁটাইল পাটাউলঅ গহালি তবে হউ
 বাঢ়নি ত না কবউ ধউঅল।
 অহিরে— গহালিকর দুআইরেহিঁ বাঢ়িন গাঁজি দেল হউ
 সিরি গেইআক সিরে লাগি জাই।
 অহিরে— পানঅ খাইকে তবে গলউ ফেঁকি দেহই হউ
 গঁগা গহালিঞ ফেলি দেই।
 অহিরে— বহুতঅ না গেইআ তবে চভড়ি রহত হউ
 আলি দেখেঁ নেহি গঅ লাগাই জাই।
 অহিরে— এহে রকম করি গেইআ তবে রহি গেল গউ
 বেড়ি দুখেঁ দিনঅ বিতি জাই।
 অহিরে— দেখেঁ তবে সিরি গেইআ ভাভে সে লাগল গউ
 এহে মতে কিনা গঅ উপাই?
 অহিরে— হামরাকর বেড়ি দুখে দিনঅ গমহ গউ
 এখন কিনা গঅ উপাই?
 অহিরে— সিরি গেইআ মনে মনে ভাভে সে লাগলঅ গউ
 হামে জাইবঅ ঠাকুরেকর পাস।
 অহিরে— সিরকিবিলাসে ঠাকুর আর রহি গেল গউ
 হর পারবতি রহি জাই।
 অহিরে— মেঢ়ি না গেইআ আর সংগেই রহি গেল গউ
 গেইআকে ত কহে রে লাগল।
 অহিরে— সূনে না সূনে মেঢ়ি বচনঅ হামর গউ
 সূনে তবে কানঅ ত লাগাই।

অহিরে—একর ঘারে হামরা আর নেহি রহবঅ গউ
 চলি জাউব ঠাকুরেকর ঘার।
 অহিরে— দেখেঁ তবে অকর বেটাঞ সাঁতাউএ লাগহ গউ
 হামরাক বেড়ে দুখ লাগি জাই।
 অহিরে— আসিন পাইরাএ দেখেঁ কাততিক সামালঅ গউ
 সিরি গেইআ সঁচে রে লাগল।
 অহিরে— কাত্তিকের পইলা দিনে তবে চলি জাউবউ গউ
 চলি জাইব সিরকিবিলাস।
 অহিরে— তবে সিড়িপটঅ রাইতেঁ আর উঠলি গউ
 চলি জাত সিরকিবিলাস।
 অহিরে— জতেক না গেইআ দেখেঁ নিদাইএ গেল গউ
 সিরি গেইআ বাহারাএ জাই।
 অহিরে— মুড়েকেরি টাড়া দেখেঁ ঠেলি খসাই লেলি গউ
 গহালি সেঁ বাহরাই চলি জাই।
 অহিরে— সিরি গেইআ একুড়াহিঁ তবে চলি জাহ গউ
 চলি জাহ সিরকিবিলাস।
 অহিরে— তবে সিরি গেইআ আর চলি নাইরে গেলি গউ
 চলি গেলি ঠাকুরেকর ঘার।
 অহিরে— দেহরিএঁ তবে গেইআ ডাঁঢ়াই না গেলি গউ
 ঠাকুরকে ত হাঁকাউএ লাগই।
 অহিরে— দেখেঁ গেইআ দুআরেহিঁ কাঁদে রে লাগলি গউ
 কাঁদে গেইআ অঝর নইআন।
 অহিরে— পারবতিকর কানে তবে রদনঅ অনাল গউ
 ঠাকুরকে ত কহে রে লাগই।
 অহিরে— সুন্য না সুন্য ঠাকুর বচনঅ হামর গউ
 সুন্য তবে কানঅ ত লাগাই।
 অহিরে— হামরাকর দুআইরে কনে ডাঁঢ়াই গেলি গউ

কনে ত কাঁদে রে লাগই।
 অহিরে— মহাদেবকে তবে পারবতিঞ কহি লেলউ গউ
 মহাদেবেক ধেআন টুটি জাই।
 অহিরে— মহাদেবে তবে আর উঠি নাই রে গেল গউ
 সভে কথা সুনবে করই।
 অহিরে— এতেক রাতিঞ কনে আর কাঁদি নাই রে লেই গউ
 দুআইরে ত কাঁদে রে লাগই।
 অহিরে— ভইড়েহিঁ খড়ম তবে আর লাগাই লেল গউ
 হাঁথে চিমটা আর গঅ লেইএ লেই।
 অহিরে— নন্দি ভিঁরগি চেড়ি অকর সংগেই রহি গেল গউ
 দুআইরে ত রহি নাই জাই।
 অহিরে— ভইড়ে ত তবে আর খড়ম লাগাই লেলউ গউ
 হাঁথে চিমটা গ লেইএ লেল।
 অহিরে— তিরসুল বুঢ়া বাপেঁ মুইঠে ধরি লেলউ গউ
 আন হাঁথে সিঁগা ধরি লেল।
 অহিরে— খাটাক খুটুক করি মহাদেব আইল জে চলল গউ
 ভলা বাবা আইল গ চলল।
 অহিরে— জাইএ তবে ছড়কা আর খসাই নাহি দেলউ গউ
 সিরি গেইআকে ভালি রে পাউঅই।
 অহিরে— এতেক রাতিঞ কাহে তবে আইলে জে চললে গউ
 কিআ তর দুখঅ লাগি জাই।
 অহিরে— সিরি গেইআ দেখেঁ তবে কাঁদে ত লাগহ গউ
 কাঁদে গেইআ অঝরঅ নইআন।
 অহিরে— কিআ কহবঅ বাপা কহনঅ না জাই গউ
 মুহে ফুটি নেহি কহা জাই।
 অহিরে— মুহেকর কথাঞ তরঅ নেহি বিসুআস হেতউ গউ
 চালে ঠাকুর সংগেই লেলে জাব।

অহিৰে— ভলা বাপে তবে আর কহে ত লাগহ গউ
 গেইআকে ত কহে রে লাগই।
 অহিৰে— কিআ তরা দুখঅ আর লাগি নাইরে গেল গউ
 হামকে তঁহি দেবে গঅ সুনাত।
 অহিৰে— নন্দকর হাঁথে হামরা রহি নাইরে গেল গউ
 বেড়ি সুখে হামরা রহি জাই।
 অহিৰে— সিংগালাখা গেইআ হামরা নন্দকরহি গেল গউ
 নেহি মারই দুবেকর আসাত।
 অহিৰে— নন্দকর উমেইর আর হেইএ নাইরে গেলা গউ
 বেটা বহকে দেলঅ গঅ সমঝাই।
 অহিৰে— দুবাইলাল নাম আর লাগি নাইরে গেল গউ
 বেড়ি রড়অ তবে লাগি জাই।
 অহিৰে— টিকরে টিকরে আর হামরাকে চরাই লেতউ গউ
 দেখে আর ঠেংগাই নাই রে লেই।
 অহিৰে— কনহ গেইআ আর জদি কাছাত লড়কি চরত গউ
 দউড়িকে চাড়াউএ লাগই।
 অহিৰে— বেরা উঠাত ঘুমাই উঠতউ তবে লেইএ জাতউ গউ
 লেলে জাইতঅ বুরুহিরিক বন।
 অহিৰে— দুবাইলালেক বহ আর সাঁতাউএ লাগলঅ গউ
 বাছুরিকে সাঁতাউএ লাগই।
 অহিৰে— জাঁঘ ধরি গহাইলেহিঁ খালঅ রহি গেলউ গউ
 খামঅ খুঁটাএ গবর পঁছি জাই।
 অহিৰে— বিনা ধইএ বাটিন দেখে গঁজি রাখি দেহ গউ
 ছাঁছঅ রে দেহইরে গঁজি জাই।
 অহিৰে— এহে তিআ করি হামরাক দুখঅ লাগি গেলই গউ
 চালে ঠাকুর সঁগে লেলে জাম।
 অহিৰে— ঠাকুরকে জাইএ গেইআএ লালিসঅ ঠকলঅ গউ

চালে ঠাকুর সঁগে লেলে জাম ।

অহিরে— হামর দুখঅ দেখে লাই তকে লেইএ জাম গউ
চালে বাপা সঁগেই চলি জাব ।

অহিরে— মহাদেবেঁ দেখেঁ গেইআকে কহে সে লাগলঅ গউ
সুনে তবে বচনঅ হামর ।

অহিরে— সুনে না সুনে গেইআ বচনঅ হামরঅ গউ
সুনে তবে কানে ত লাগাই ।

অহিরে— এখন তঁহি আর বাবা ঘুরি নাই রে জাবে গউ
হামে আর জাউবঅ গঅ চলল ।

অহিরে— তর দুখ দেখে লাইএ হামে চলি জাউব গউ
তঁহি এখন ঘুরি চলি জাঞ ।

অহিরে— কাততিকঅ মাসে তবে আমাসঅ হেতেইক গউ
উদিন হামে জাউবঅ গঅ চলল ।

অহিরে— ঘাউআ আমাসেক দিনে হামে চলি জাউব গউ
এখন তঁহি ঘুরি চলি জাঞ ।

অহিরে— তরঅ দুখঅ দেখে লাইএ হামে চলি জাউব গউ
আমাসে হামে চলি জাব ।

অহিরে— গেইআ দেখেঁ আর তবে ঘুরি নাইরে গেলউ গউ
রাতারাতিঞ ঘুরি নাইরে জাই ।

অহিরে— উঠিনলে তবে গেইআ আইলঅ রে চললঅ গউ
গঁগা রে গহালিঞ সামহাই জাই ।

অহিরে— কনহি গেইআঞ তবে নেহি জানল গউ
মেড়ি গেইআঞ তবে জানি জাই ।

অহিরে— মেড়ি না গেইআঞ তবে পঁছে না লাগলি গউ
অনাউএ হামরি বচন ।

অহিরে— এতেক রাতিঞ তঁহি আর কাঁহা চলি গেলেই গউ
কাকর আবাদ খাউবে করল ।

অহিরে— দেখেঁ সিরি গেইআঞ আর কহে সে লাগলই গউ
 সূনে তবে বচনঅ হামর ।
 অহিরে— হামে জে আবাদ কাকরউ নেহি খাইএ লেলউ গউ
 চলি গেলিঅ ঠাকুরেকর ঘার ।
 অহিরে— হামরাকর বেড়ে জে দুখঅ লাগি গেলি গউ
 লালিস হামে তবে করি জাই ।
 অহিরে— মেড়ি গেইআঞ তবে আর পঁছে জে লাগল গউ
 কখন ঠাকুর আউত গঅ চলল ।
 অহিরে— সিরি না গেইআঞ আর কহে জে লাগলই গউ
 সূনে তবে বচনঅ হামর ।
 অহিরে— ঘাউআ আমাসেক ঠাকুর চলি আউতউ গউ
 হামর দুখঅ দেখি নাই রে জাই ।
 অহিরে— এহে রকম আনার বানার গালমারি লেলউ গউ
 সিরি গেইআঞ বুঝাই নাই রে জাই ।
 অহিরে— দেখেঁ তবে কাততিকে আমাসেক রাইত গউ
 গেইআঞ দিনঅ গনে রে লাগই ।
 অহিরে— দেখেঁ ঘাউআ আমাস আর চলি আউলউ গউ
 গেইআঞ দেখেঁ ভালে রে লাগই
 অহিরে— সিরি না গেইআ দেখেঁ ভালে রে লাগল গউ
 আমাসে ভালে রে লাগই ।
 অহিরে— দেখেঁ তবে গহাইলেহিঁ খালেই রহি গেল গউ
 ঝেঁইটা পেইটা নেহি গঅ করই ।
 অহিরে— দেখেঁ সিড়িপটঅ রাতি হেইএ গেলউ গউ
 ঠাকুর তখন আইল গঅ চলল ।
 অহিরে— গেইআকর দুখ দেখে আইল গঅ চলল গউ
 সামহাই গেলঅ গঁগা রে গহাইল ।
 অহিরে— গঁগা রে গহাইলিঞ জাএ ভালি নাই রে লেলঅ গউ

চাইর বাটে ভালে রে লাগল ।
 অহিরে— খাল ডভ দমে আর গহাইলে রহলঅ গউ
 ঢেইর গেইআ চভড়ি রহি জাই ।
 অহিরে— খামঅ খুঁঠাঞ দেখেই আর গবর পঁছি দেল গউ
 খুঁটা দেখে মটাই রহি জাই ।
 অহিরে— পান খাইএ গলঅ আর ফেলি নাইরে দেল গউ
 গঁগা রে গহাইলে পেলি দেই ।
 অহিরে— ছাঁছআ দেহরি তবে আর দেখি লেলউ গউ
 বাঢ়িন দেখে গঁজলে রহি জাই ।
 অহিরে— বিনা ধইএ বাঢ়িন দেখে আর গঁজি দেহ গউ
 সভে জে দেখে জে পাউঅই ।
 অহিরে— ঠাকুরেকর মনে আর বিসুআস লাগি গেল গউ
 নিজেক নজইরে সভে জে দেখইঅ ।
 অহিরে— বাছুরি তবে আর ডাঁঢ়াই রহি গেল গউ
 মাড় পানি নেহি জে পাউঅই ।
 অহিরে— দেখে তবে ঠাকুরেহিঁ কহে জে লাগলউ গউ
 সিরি গাইকে কহে রে লাগই ।
 অহিরে— সূনে না সূনে গেইআ বচন হামর গউ
 সূনে তবে কানঅ জে লাগাই ।
 অহিরে— তকে জে হামে আর লেলে চলি জাউবউ গউ
 হামর ঘারে লেলে চলি জাই ।
 অহিরে— কতেক দুখ তবে তর লাগি নাই রে গেলউ গউ
 তকে হামে লেলে চলি জাই ।
 অহিরে— বুঢ়ি বাঁদনাক দিনে তকে লেলে চলি জাউবউ গউ
 এখন হামে ঘুরি চলি জাই ।
 অহিরে— এহে তিআ কাথা দেখে তবে কহি লেলউ গউ
 গেইআকে ত কহি নাই রে জাই ।

- অহিরে— অহঠিনলে ঠাকুর দেখে দার দুরি গেলউ গউ
চলি গেলউ সিরিকিবিলাস।
- অহিরে— এহে তিআ সুকুরওজারি করি গেলউ গউ
ঠাকুরে ত কহে রে লাগই।
- অহিরে— জাইএ তবে পারবতিকে সুনাইএ লাগল গউ
বেড়ি দুখঅ গেইআক হেইএ জাই।
- অহিরে— মুহে কর কথাএ হামে বিসুআস নেহি করল গউ
নিজেক নজরিএ রে দেখই।
- অহিরে— এতেক দুখে দেখে তবে গেইআ রহি গেলউ গউ
হামে হিঁআ লেইএ রে আনব।
- অহিরে— এহে তিআ কথা তবে পারবতিকে সুনাইল গউ
পারবতি ত তবে কহি জাই।
- অহিরে— বুড়ি বাঁদনাক রাতিএ হামে লেইএ আনব গউ
গেইআকে ত লেইএ রে আনব।
- অহিরে— পরব দেখে তবে বাবা পাইরাএ গেলউ গউ
ঠাকুর ত আউত রে চলল।
- অহিরে— দেখে বুড়ি বাঁদনাক রাতিএ ঠাকুর চলি আইল গউ
চলি আইল গঁগা রে গহাইল।
- অহিরে— দেখে সিড়িপটঅ জখন রাতি হেইএ গেলাই গউ
ঠাকুর তবে সামহাই নাই রে জাই।
- অহিরে— তবে সিরিগেইআকে ত কহে জে লাগলঅ গউ
সুনে গেইআ কানঅ জে লাগাই।
- অহিরে— সুনে না সুনে গেইআ বচনঅ হামর গউ
সুনে তবে কানে জে লাগাই।
- অহিরে— একে পাইজে তহরা সভে তবে চলি জাউবে গউ
তবে হামে লেলে চলি জাম।
- অহিরে— সিঁগালাখা গেইআ আর রহি না গেলই গউ

দেখে তবে বাহরাইএ জাই।
অহিরে— জুঁঞা থারাথারিক লেখে সভে বাহরাই গেলাই গউ
সভেকাই বাহরাই চলি জাই।
অহিরে— তবে মাহাদেব আর আগুই রহি গেলাই গউ
জতেক গেইআ পেছুঞ চলি জাই।
অহিরে— সভেকর পেছুই তবে মেটি গেইআ রহই গউ
নেজঅ তবে ঘঁসড়াই নাই রে জাই।
অহিরে— নেজে তবে জতেক পাইজকে মেটাই লেলে জাহ গউ
মেটি গেইআঞ মেটাই লেলে জাই।
অহিরে— এহে তিআ জতেক গেইআর আর চলি জাউঅই গউ
চলি জাহ সিরকিবিলাস।
অহিরে— ঢেইর ধুর দেখে আর চলি নাইরে গেলাই গউ
চলি জাহ সিরকিবিলাস।
অহিরে— দেখে আর বাইসাম বেরাঞ ঘুমাই উঠি গেলাই গউ
দুবাইলাল ঘুমাই উঠি জাই।
অহিরে— ছাতা ঠেঁগা লেইএ আর গহাইল চলি গেলাই গউ
তবে আর ভালে রে লাগল।
অহিরে— গহালিত চাইর কুন সুইন রহি গেলই গউ
সিঁগালাখা গেইআ নেহি পাই।
অহিরে— সিঁগালাখা গেইআ হামর কাঁহা চলি গেলই গউ
কঁদে ত চরে লেলে জাই।
অহিরে— দুবাইলালে জাইএ তবে সুনাই নাই রে দেলই গউ
ননদকে ত সুনাইঅই বানার।
অহিরে— সূনে না সূনে বাপঅ বচনঅ হামর গউ
সূনে তবে কানে ত লাগাই।
অহিরে— গেইআ হামরা একেটি ত নেহি রহলই গউ
কনে ত লেইএ চলি জাই।

- অহিরে— ধড়অ ফড়অ করি ননদ তবে উঠি গেলই গউ
চলি গেলই গঁগা রে গহাইল।
- অহিরে— ননদকর বহুঅ সঁগে চলি গেলি গউ
দেখে পাউঅই সুইন রে গহাইল।
- অহিরে— হাই হাই করি ননদ কাঁদে জে লাগলই গউ
কনে হামর লেইএ চলি জাই।
- অহিরে— গাঁউএকর লকজন ডাকে জে লাগলই গউ
সিঁগালাখা কাঁহা চলি জাই।
- অহিরে— কনে হামর গেইআকে ত লেলে চলি গেলাই গউ
সভে টউআ করে বাহরাই জাই।
- অহিরে— কনঅ বাটে চিনহামুদা নেহি পাউঅল গউ
নন্দঅ তবে কাঁদে রে লাগল।
- অহিরে— বাড়িকঅ হেঁঠে আর গাছঅ রহি গেলই গউ
সিমেইর গাছঅ রহি জাই।
- অহিরে— মাহাদেবেক দহাই দেইএ গাছঅ চঘি গেলাই গউ
চঘি গেলাই গাছেকেরি ফুদ।
- অহিরে— গাছেকেরি ফুদে জাইএ চাইরঅ বাটে ভালেই গউ
কনহ বাটে সাড়া নেহি পাই।
- অহিরে— পচছিঅ বাটে নন্দএও ভালে সে লাগলই গউ
লালঅ ধুরা নজরিএও সুঝাই।
- অহিরে— লাল ধুরা নন্দএও আর নজরিএও গমলঅ গউ
অহে তবে গেইআ চলি জাই।
- অহিরে— গাছঅ উপরলে ননদ তবে নাভি গেলাই গউ
পচছিমে চলে রে লাগই।
- অহিরে— মার মার করি ননদ দউড়ে রে লাগলাই হউ
চলি গেলা বহুত না ধুর।
- অহিরে— দেখেঁ তবে ননদ আর পঁহচিএ গেলাই গউ

দেখে পাউঅই সিংগালাখা গাই।
 অহিরে—দেখে তবে মহাদেব সঁগেই রহি গেলই গউ
 নন্দ ত হাইচক হেইএ জাই।
 অহিরে—কিনা বুইধে হামে তবে গেইআকে ঘুরাউঅব গউ
 নিজে মহাদেবঅ রহি জাই।
 অহিরে—কনহ দসঅ না হেলে নেহি আনত গউ
 নিজে ঠাকুর লেইঅ চলি জাই।
 অহিরে—নন্দএ একঅ বুইধ আর মনে দাঁজি লেলই গউ
 আগু বাটে অগুআই নাই রে জাই।
 অহিরে—আগুবাটে জাএ নন্দ আর গিরি দেলঅ গউ
 সিরি গেইআএ দেখে রে পাউঅি।
 অহিরে—নন্দকে দেখে গেইআএ তবে চিনহি লেলউ হউ
 তবে গেইআ ভাভে রে লাগই।
 অহিরে—বহুত না দিন হামরাকে পালল পুসল গউ
 কেসে হামে ডেংগি চলি জাই।
 অহিরে—এহে রকম সিরি গেইআএ সঁচে রে লাগলই গউ
 জতেক গেইআ ডাঁড়হাই রহি জাই।
 অহিরে—দেখে জতেক গেইআ তবে গঠাই নাই রে গেলই হউ
 মহাদেবে ভাভে রে লাগই।
 অহিরে—কেসে তবে গেইআকে ভিড়কাই নাই রে দেলই হউ
 বাঘ না ভালুকঅ লাগি জাই।
 অহিরে—মহাদেব তবে জে ফেরকাটি আউঅল গউ
 দেখে পাউঅই নন্দঅ উভড়াই।
 অহিরে—মহাদেবে নন্দকে দেখে রে পাউঅল গউ
 ভলাবাবা ভাভে রে লাগই।
 অহিরে—নন্দত তবে জে ডাঁড়াই ভালা গেলই গউ
 দেখে পাউঅই সিরি রে গাই।

অহিরে— মাহাদেবেঁ তবে দেখেঁ কহে লাগলই গউ
 সিরি গেইআকে কহে রে লাগই।
 অহিরে— একে তরা ফেরকাটি সভে চলি জাবে গউ
 এঞ ইঠিন গিরল রহি জাই।
 অহিরে— সিরি গেইআঞ মাহাদেবকে বুঝাউএ লাগলই গউ
 সূনে ঠাকুর বচনঅ হামর।
 অহিরে— একর হাঁথে হামরা জে বহুত দিন রহলঅ গউ
 বেড়ি সুখে দিনঅ কাটি জাই।
 অহিরে— একর কনহ দস বাবা নেহি রহলঅ গউ
 একর বেটাঞ দস করি জাই।
 অহিরে— মাহাদেবেঁ জাইএ নন্দক হাঁথঅ ধরি লেলউ গউ
 হাঁথঅ ধরি উঠাবে করই।
 অহিরে— তরঅ গেইআ নেহি আর ঘুরি চলি জাউতউ গউ
 তঁহি বাবা ঘুরি চলি জাঞ।
 অহিরে— দেখেঁ তবে নন্দঅ ত ভইড়ে গিরি দেলউ গউ
 ঠাকুরেকর গড় ধরি জাই
 অহিরে— সূনে না সূনে বাবা বচনঅ হামরঅ গউ
 মহাপাপি হামে লাগি জাই।
 অহিরে— হামর পাপঅ তঁহি বাবা খেমা করি দেবে গউ
 সূনে বাবা বচনঅ হামর।
 অহিরে— মাহাদেবেঁ নন্দঅকে তবে কহি লেলউ গউ
 তরঅ কনহ দস না রহই।
 অহিরে— তঁহি এখন ঘারে তবে ঘুরি চলি জাবে গউ
 বেটাকে তর কহি নাইরে জাঞ।
 অহিরে— বারঅ বছরঅ তঁহি গঠঅ পূজা করবে গউ
 পাঘা পূজা আর করেঁ জাঞ।
 অহিরে— গঠঅ পূজা তঁহি আর করি নাই রে লেবে গউ

তবে গেইআ পাউবে করই।
 অহিরে— কাঁদি কাঁদি নন্দ অ তবে আর ঘুরি আইল গউ
 গঁগা রে গহাইলিঞ সামাঞ জাই।
 অহিরে— গঁগা রে তবে নন্দঅ ঢুকি নাই রে গেলেই গউ
 উভড়ি ত গিরবে করই।
 অহিরে— অহে ঠিনে ধন্না দেই গিরি রহল গউ
 নন্দঅ ত রহি নাই রে জাই।
 অহিরে— দুবাইলালকে তবে আর কহি নাই রে দেলউ গউ
 সূনে বেটা বচনঅ হামর।
 অহিরে— হামরাকরঅ গেইআ বেটা আর চলি গেলউ গউ
 চলি গেলই সিরকিবিলাস।
 অহিরে— তঁহি জে বেড়ি পাপ তবে করি লেলে গউ
 গরুক মুহ নেহি দেখে পাই।
 অহিরে— ভগবতি তঁহি আর নেহি পাউএবে গউ
 মহাপাপ তবে লাগি জাই।
 অহিরে— বারঅ গঅ বছর তঁহি গঠ পূজা করবে গউ
 তবে তঁহি পাউবে করই।
 অহিরে— এহে তিআ কথা বাততা সমুঝাএ দেলই গউ
 বেটাকে ত দেলই গঅ বুঝাই।
 অহিরে— বিনা খাইএ নন্দঅ ত তপঅ করহ গউ
 গঁগা গহাইলে গিরি জাই।
 অহিরে— অনতর জাননি বাবা আর লাগি গেলই গউ
 অনতরে জানি নাই রে জাই।
 অহিরে— নন্দঅ দেখেঁ উপাসে গহাইলিঞ রহল গউ
 তবে সপুন দেইএ নাই রে জাই।
 অহিরে— জাঁহি নন্দঅ তঞ আর পূজা করি লেবে গউ
 তঁহি তবে পাএ নেহি জাই।

অহিরে— তখন তবে নন্দঅ চলি নাইরে গেলই গউ
গঠ পূজা করবে করই।

অহিরে— দুখে পুতে নন্দঅ আর বড়ি ভাইগমান গউ
মাহা পাপ বেটারি করই।

অহিরে— সিরি গেইআক কথা হামে আর রাখি সেনই গউ
এহে ঠিনে রাখি নাই রে জাই।

গিত

অহিরে— কিআ ধিআনে গেইআ ঘারা সে বাহরাল রে বাবু হউ
কিআ ধিআনে বনা জাই?

কিআ ধিআনে গেইআ ঘারা সে ঘুরইএ
কিআ ধিআনে দুধা দেই?

অহিরে— সুরজ ধিআনে গেইআ ঘারা সে বাহরালই রে বাবু হউ
ঘাঁসা ধিআনে গউ বনা জাই
বাছুরি ধিআনে গেইআ ঘারা সে ঘুরলই গউ
কিসান ধিআনে গউ দুধা দেই।

অহিরে— কনেহি সেহইএ চইত বইসাখ রে বাবু হউ
কনে ত সেহইএ আসাড় মাস?
আর কনে ত সেহইএ সহল ভাদর মাস
কনে ত সেহইএ কাততিক মাস?

অহিরে— কিআ লাইএ সেহইএ চইত বইসাখ রে বাবু হউ
কিআ লাইএ সেহইএ আসাড় মাস?
কিআ লাইএ সেহইএ পড়ত ভাদর মাস
কিআ লাইএ সেহইএ কাততিক মাস?

অহিরে— ছাগইরিহিঁ সেহইএ চইত বইসাখ রে বাবু হউ
মইসি ধনি সেহইএ আসাড় মাস
বেটি ছউআঞ সেহইএ সহল ভাদর মাস
গেইআ ধনি সেহইএ কাততিক মাস।

অহিরে— কিআ লাইএ সেহইএ চইত বইসাখ রে বাবু হউ
কিআ লাইএ সেহই আসাড় মাস?
কিআ লাইএ সেহইএ পড়ত ভাদর মাস
কিআ লাইএ সেহই কাততিক মাস?

অহিরে— পালহা লাইএ সেহইএ চইত বইসাখ রে বাবু হউ
ঘাঁসা লভে সেহই আসাড় মাস

করম লভে সেইএ সহস ভাদর মাস
 দুব ধান লাইএ সেইএ কাত্তিক মাস।
 অহিরে— কাঁহা লাইএ অহিরাএ গেইআ সে চরাউঅইরে বাবু হউ
 কাঁহা ত পানি রে পিআই?
 কাঁহা ত অহিরাএ করত বাথানঅ রে
 কাঁহা চড়ি বাঁসি রে বলাই?
 অহিরে— রনে বনে অহিরাএ গেইআ সে চরাউঅই রে বাবু হউ
 মালাদহে পানি রে পিআই
 বউরা তলে অহিরাএ করলঅ বাথান ভাই
 বউরাএ চঘি বাঁসিআ বলাই।
 অহিরে— কিআ লভে অহিরাএ গেইআ সে চরাই রে বাবু হউ
 কিআ লাইএ পানিরে পিআই?
 কিআ লাইএ অহিরাএ করলঅ বাথান ভাই
 কিআ লাইএ বাঁসি রে বলাই?
 অহিরে— ঘাঁসা লভে অহিরাএ গেইআ সে চরাই রে বাবু হউ
 দুধা লভে পানি রে পিআই
 গবর লভে অহিরাএ করল বাথান
 ধনিক লভে বাঁসি রে বলাই।
 অহিরে— উততরে দকখিনে বাঁগলা টানই রে বাবু হউ
 পুরুবে ত রাখবে দুআইর
 বাহরাতে সামাঅইতে গেইআএ সুরুজ খিআতই গউ
 বাঢ়ি জাইত সিঁগালাখা গাই।
 অহিরে— বতিআএ বতিআএ হামে জাই হেল রে বাবু হউ
 তর ধলি গেইআএ আনল ঘুরাই।
 সুনে রে ধিঁগুঁআড় হামর কিসানা ঘার
 বাঁট বেগে করত বিদাই।
 অহিরে— বাঁট বেগে করত বিদাই রে বাবু হউ

ধতি দেইএ করত বিদাই।

অহিরে— পিঠা ত দেলে গলিন বরদেকর পানি রে বাবু হউ
নেহি দেলে সঁচলঅ ধান
তর ঘারে আহউ ভালা দস জে পুতা রে
ধতি দেইএ করবে বিদাই।

অহিরে— বাঘেকর ছউআ হেইকে কুলাই না ঢাকাইহা হউ
জনম জুগ রহি জাইত নাম।

অহিরে— কনঅ পনথে নাভইএ বাঘা সে বাঘিনি রে বাবু হউ
কনঅ পনথে নাভই ধেনু গাই?
কনঅ পনথে নাভইএ জাইলাকর বেটা ভাই
কনঅ দহে ফেঁকই মাহাজাল?

অহিরে— রনে বনে নাভইএ বাঘা সে বাঘিনি রে বাবু হউ
ডহর পনথে নাভই ধেনু গাই
গাঢ়াঞ ঢঢ়াঞ নাভইএ জাইলাকর বেটা ভাই
মালাদহে ফেঁকই মাহাজাল।

অহিরে— জালঅ ফেঁকইতে জাইলা ডুবি মরলই রে বাবু হউ
জাইলাকর নামঅ ডুবি জাই
কনঅ কাঁদতউ জাইলা অহরে পহরে রে
কনঅ কাঁদতউ ছয়মাস?

অহিরে— কন কাঁদতউ জাইলা ডেড় পহর রাতিআ হউ
চলি জাইত দসর দুআইর?

অহিরে— মাঞ কাঁদতউ জাইলা অহরে পহরে রে বাবু হউ
বহিনি কাঁদতউ ছঅ মাস
আর তিরিআ কাঁদতউ জাইলা ডেড় পহর রাতিআ হউ
চলি জাইতউ দসর দুআইর।

অহিরে— কাকর হেকই ভালা উঁচঅ নিচ বাখইল রে বাবু হউ
কাকর নাম জাগি জাই?

কাকর হেকই ভালা লিল কনঠি ঘাঁড়িয়া হউ
কনে ত করহ সউআর ?

অহিরে— বড়কাকর হেকি ভালা উচঅ নিচঅ বাবইল রে বাবু হউ
মেইঝালাকর নামঅ জাগি জাই
সেইঝালাকর হেকই ভালা লিল কনঠি ঘাঁড়িয়া হউ
ছটঅ বাবুঞ করহ সউআর ।

অহিরে— কনঅ মরলে অহিরা কাঁচা সে কুঁঅর রে বাবু হউ
কনঅ মরলে রে টুঅর ?
কনঅ মরলে অহিরা বাঁহি বলা টুটইএ
কনঅ মরলে ঘারা সুইন ?

অহিরে— বাপ মরলে অহিরা কাঁচা সে কুঁআরা রে বাবু হউ
মাঞ মরলে রে টুঅর
ভাই মরলে অহিরা বাঁহি বলা টুটইএ
ভউজি মরলে ঘারা সুইন ।

অহিরে— উঠে রে অহিরা জাগে রে অহিরা রে বাবু হউ
মইসি ধনি ঠকহ কাঠাড ?
নেহি হামে উঠব নেহি হামি জাগব হউ
নেহি মইসি খলব মইলান ।

অহিরে— জাড়ে সিসিরে অঁগ ভিজইএ রে বাবু হউ
নেহি মইসি খলব মইলান ।

অহিরে— গড়ে ত দেবউ পুতা মুচু মুচু জুতা রে বাবু হউ
গাতে দেবউ দহরি চাদর
মুড়ে ত দেবউ পুতা ডেড় পগড়িয়া হউ
হাঁথে দেবউ পাঁড়রি কা ডাঁগ ।

অহিরে— হাঁথে দেবউ পাঁড়রিকা ডাঁগ হউ
উঠে পুতা খলবে মইলান ।

অহিরে— কাঁহাই পাউঅব ভালা মুচু মুচু জুতা রে বাবু হউ

কাঁহা পাউঅব দহরি চাদর ?

কাঁহা ত পাউঅব ভালা ডেড় পগড়িআ হউ

কাঁহা পাউঅব পাঁড়রিকা ডাঁগ ?

অহিরে— মুচি ঘারে পাউঅব ভালা মুচু মুচু জুতা রে বাবু হউ

জলহা ঘারে দহরি চাদর

সদাগর ঘারে পাউঅব ভালা ডেড় পগড়িআ হউ

বিজুবনে পাঁড়রিকা ডাঁগ ।

উঠে পুতা খলবে মইলান ।

অহিরে— কিআ ধিআনে গেইআ ঘারা সে বাহরালই রে বাবু হউ

কিআ ধিআনে বনা জাই ?

কিআ ধিআনে গেইআ ঘারা সে উড়ইএ হউ

কিআ ধিআনে দুধা দেই ?

অহিরে— সুরজঅ ধিআনে গেইআ ঘারা সে বাহরাল রে বাবু হউ

ঘাঁসা ধিআনে বনা জাই

বাছুরি ধিআনে গেইআ ঘারা সে ঘুরইএ হউ

কিসান ধিআনে দুধা দেই ।

অহিরে— সঁকট গলিআ পুরবে দুআরি রে বাবু হউ

ইফরলে আউঅই ধলি গাই

ধলি গেইআকে কনে নজরি চালাঅই হউ

তাকর অইখে ভেলুআকা তের ।

অহিরে— দস ধেনু গাইএক পেছাঞ বাবু অহিরা রে বাবু হউ

কাদা ছিঁটলে অঁগ জাই ।



কিরিটি মাহাত

জন্ম- পুরুলিয়া জেলার পাড়া থানা এলাকার
বামকৃষ্ণপুৰ (নতুনডি) গ্রামে।
কুড়মি-কুড়মালি গবেষণা জগতে একজন
সুপরিচিত নাম। যিনি একধারে ঝুমুর গায়ক
এবং অন্যদিকে একজন গবেষক। কুড়মালি
সাহিত্যে স্নাতকোত্তর করার পরই ঝাঁপিয়ে
পড়েন গবেষণার কাজে। ইতিমধ্যেই তাঁর
ঝুমুর ও চর্যাপদ গ্রন্থটি বিদ্বজন মহলে সাড়া
ফেলেছে। শুধুমাত্র কুড়মি-কুড়মালি গবেষণার
জন্য চেষ্টা ফেলেছেন বাংলা, ঝাড়খন্ড এবং
ওড়িশ্যা। তার মৌলিক কাজগুলি যেভাবে
গবেষক মহলে সাড়া ফেলেছে তাতে
কুড়মি-কুড়মালি চর্যায় নতুন দিগন্ত ধরা পড়বে
এটা বলাই যায়।



অধ্যাপক রঞ্জিত কুমার মাহাত

জন্ম- পুরুলিয়া জেলার পুরুলিয়া (মফঃ) থানা
এলাকার হরিয়াল গাড়া গ্রামে। কাশিপুর
মাইকেল মধুসূদন মহাবিদ্যালয় থেকে
সাম্মানিক স্নাতক (বাংলা)। বর্ধমান
বিশ্ববিদ্যালয়ের বাংলা বিভাগ থেকে
বিশেষপত্র কথাসাহিত্য নিয়ে স্নাতকোত্তর
উত্তীর্ণ। পরে আবার বিনোদ বিহারী মাহাত
কয়লাঞ্চল বিশ্ববিদ্যালয়ের বাংলা বিভাগ থেকে
বিশেষপত্র কথাসাহিত্য নিয়ে স্নাতকোত্তর
উত্তীর্ণ। ২০১২ সাল থেকে সাঁওতালডি
কলেজে অধ্যাপনার কাজের সাথে যুক্ত
(বর্তমানে State aided college
Teacher) আগ্রহের বিষয় লোকসংস্কৃতিচর্চা।



মূলকি কুড়মালি ভাখি বাইসি